


南澗甲乙稿 附拾遺

二










稿乙甲潤南
遺拾附

(二)



韓元吉撰

南澗甲乙稿卷六

五言絕句

遺直堂六首

蒿萊自興臺。松桂猶伯叔。便合追孔林。無庸號寒木。
虬龍舞雲端。風雨來海上。尙想堂中人。詩成一迴向。
苦心有深思。勁質無軟語。賢科廢因公。此事瓦千古。
種木已如此。高賢有餘思。賴公酷似舅。其誰羨牢直。
鄭虔骨已朽。孔父天不遺。他年從事賢。手板空倒持。
棟梁乃不取得地。且深植妖嬈紫薇花。歲晚猶伴直。

夜宿斜溪聞杜鵑

解攬山銜日。移舟雨暗溪。無情子規鳥。夢斷隔林啼。

送龐祐甫五首

燕鴻望南飛。春至還北去。託食波浪中。瀟湘幾回渡。

遊子思故鄉。天涯兩相逢。時平甘卹緯。定交各塗窮。
濯濯機中絲。粲粲錦繡段。自非同心人。千金孰肯換。
江湖多青山。舟楫長往還。山色難送客。不如住山閒。
中宵櫂謳發。菰蒲翳明月。月黑君忽行。恐墮蛟龍窟。

六言絕句

題日出雨腳圖二首

絕壑春林映綠。半山曉霧迷紅。長憶西巖夢覺。小舟欸乃聲中。
隱隱遙分樹色。蕭蕭似聽風聲。何處江傾海墮。隔山霧白煙明。

次韻趙公直題米元暉畫軸

天際歸雲挾雨。江干亂木藏山。耳冷似聽蕭瑟。眼明驚見孱顏。

七言絕句

春雪得小詩五首且約客登賞心亭

東牕坐愛枝間雪。大似酴醿壓架花。天氣更晴宜有月。夜深來看玉交加。

淮南山色一千里，落水層城江更湍。何地江山有如許，與君聊趁雪中看。
臘前未見梅如雪，春到還驚雪似梅。可是天公有情思，便令花樹一時開。

江南絕景賞心亭，臥雪難尋舊畫屏。白鷺洲前夜來雪，故應此畫勝丹青。
竹爐聽雪坐蒲團，長笑詩人不耐寒。未辨貂裘走南陌，肯來高處一憑欄。

夜雪

爐火深紅蠟炬明，打牕風雪正縱橫。瓦瓶旋注山泉滿，卻作瀟瀟細雨聲。
伴眼文書細作行，昏昏愁臥雪穿廊。何人恰弄風前笛，錯認梅花到枕傍。

詠晴

愁眼東西萬里情，山雲斜度水風清。客行歲晚忽春盡，看到枯林綠葉成。

春日書事五首

十年騎馬聽朝雞，老竊州符簿領迷衙。鼓不聞春睡足，閉門聊喜得幽棲。
曉猿夜鶴寂無聲，春至山禽百種鳴。步繞新泉聊洗耳，由來心與地俱清。所居山下得泉甚美。

極目亭邊花定開，野棠山杏手親栽。春風拂檻知何似，應記劉郎兩度來。
憶上金華第一峯，相君官重酒樽同。夢轉絕壑誰重到，零落山桃小院風。
溪邊亂石蛟龍臥，煙裏千花錦繡圍。記得年時作寒食，山橋吹笛雨中歸。
山橋金華山勝處。

晨興

北牕松竹夜蕭騷。詩就呼兒進濁醪。睡美不知新雨足。曉來南澗水聲高。

聽雨

咿軋籃輿不計肩。五更殘夢尙悠然。紅油蓋重聽朝雨。卻似西江坐釣船。

題張幾仲所藏醉道士圖

何須坐客總能文。呼酒相逢日暮雲。醉倒儘如狂道士。夜歸誰問故將軍。幾仲移節碧山淳熙庚子歲除前一日會飲上饒傳舍觀圖戲書南澗翁韓某無咎

浙江觀潮

江翻海涌勢難平。鼈擲鵬寰自不停。端爲君王洗兵馬。參旗井鉞萬雷霆。

大湖秋晚

片帆幾日下西風。湖色秋容暮靄中。買得鱸魚弔張翰。臥聽欸乃度垂虹。

海門斜照

雲夢懸知八九吞。銀山萬疊漲天門。長江日落魚龍舞。古寺煙深鳥雀喧。

武昌春色

樊山宮殿已成陳。煙雨陰晴到處春。花柳不知興廢事。隔江相倚鬪時新。

七夕

銀河翻浪拍空流。玉女停梭清露秋。天上一年真一日。人間風月自生愁。

秋懷十首

朝行佛屋魚千里。暮借僧牀鷓一枝。牕下秋蟲解人意。似憐羈客伴哦詩。
酒熟橙黃盛物華。重陽無客不思家。鵝兒剪雪開巖桂。鶴羽攢金散菊花。
小雨驚秋滴夜闌。晴雲和日曉斑斑。誰憐客舍塵埃底。猶得西湖一兩山。
何許砧聲清夢回。丁東猶作珮環猜。卷簾風露涼如水。端爲嫦娥向此來。
城外秋荷一半黃。尙餘疎柳照回塘。江南底許風光好。塞鴈來時未有霜。
右手持杯左不空。蟹螯已作雪蒙茸。秋風莫起鱸魚夢。未似先生阿堵中。
八月濤頭舊有名。今年潮淺岸纔平。應緣享帝千靈在。豫使魚龍不敢鳴。
塞草初黃邊馬肥。邊塵莫便向南飛。江頭鶴唳秋風起。看取陰山六騎歸。
江南四百八十寺。未抵西湖勝處多。不用樓臺帶煙雨。只看宮殿壓晴波。
閉戶跏趺意已清。爐香燒盡一燈明。空庭葉落知多少。一任西風百種聲。

聖政更新詔書正告訐之罪因得小詩十首〔案〕通鑑續編紹興二十五年十月秦檜死黜檜姻黨

十一月釋趙汾及李孟堅王之奇等自便十二月復張浚胡寅張九成等二十九人官徒李光胡銓

予近州二十六年正月追復趙鼎鄭剛中等官此詩所謂十年言路皆支黨曾州司戶卻生回衛公精爽故依然皆記其事謹附識

惡復凶終事久知豈知聖斷不踰時小儒未歎周南滯但喜逢人敢說詩桓溫將死謝安起霍氏初除魏相來誰與聖君安大業巍巍廊廟可無材聖朝遂失誅元載公議猶能去霍山落膽徒聞溫御史不知睿意在羣奸元祐諸公秉國均詔條先請惠吾民孤雛腐鼠何勞逐準擬朝廷政事新金貂七葉誰能必石櫛三年計自愚得鹿覆蕉真一夢求魚緣木信狂圖

獻可爭先試荆國瑩中居首論莆陽十年言路皆支黨前無一語譏安昌支黨用詔語

近聞羔鴈已成羣藻鑒渠能涇渭分急士且須侯雍齒得賢端可吏朱雲刺字幾漫冠欲塵向來浮薄自紛紛爾曹胸次多周孔忍作銅山破賊文荆棘誰令滿路栽雷州司戶卻生回獨憐陽陸眞天命不見承平公道開潮陽初謫八千里中令俄成十九年地下修文應泚筆衛公精爽故依然

臥病

有身自覺皆爲患了事從來卻號癡貧裏定知強健樂未妨斗酒百篇詩

夜宿青陽旅舍起觀林端積雪半消疑山焚盛開

風卷千林夜雪晴。九華山下月微明。不須更覓唐昌藥。樹樹瓏璁玉刻成。

去草

永日荒園獨荷鋤。草根藤蔓喜無餘。誰憐仲舉平生志。卻學齊民種樹書。

偶興四首

桂花飄盡菊花黃。閑對芳叢靜愛香。堂下草深須一丈。會看春意滿池塘。

小園無數菊花開。準擬花殘便見梅。不恨無花正無酒。敲門誰送一樽來。時有遠客惠酒。

江南菊少開金色。只有霜葩雜御黃。乞得黃花真愛惜。明年臘種壓羣芳。

愛水仙成百計栽。三年一笑漸能開。金銀豈是吾家物。借我虛名付酒臺。世言水仙一穗三年乃開。

市人有弄虎者兒輩請觀飼以豚蹄覩其攫噬戲作四絕句

眈眈出柙小於菟。猶意他年見畫圖。養汝由來得無患。卻驚赤手競編鬚。
呀然一嘯朔風生。兒女窺簾笑且驚。檻內應憐只搖尾。山中不記舊橫行。
長年肉食定何功。乞汝豚蹄且慰窮。猿臂將軍應老矣。南山忽憶夜轉弓。
熒熒目色爲生寒。蠻獠歌呼意自閒。莫倚便能探虎穴。勢卑還長越王炎。

俸金既盡家人問所質物戲答

十載棲遲樞具客。一生憔悴扊扅歌。典衣不爲沽春酒。平昔無詩博飯籮。

讀周瑜傳

年來三十過平頭。笑卻周郎卻自羞。但得小喬歌一曲。未須辛苦向荊州。

乘潮遇順風

忠信平生自可期。江神于我定相知。順風鼓棹潮如席。世事由來卻險巇。

山行二首

晴日烘林百草香。杖藜徐步興何長。殘花的皪明幽徑。老筍參差出斷牆。
春來南澗水初生。鷗鳥逢人自不驚。步繞幽花隨樹歇。望尋高柳趁隄行。

行汎渠中

東海桑田未可期。隋河高岸已鋤犁。樓船錦纜知無地。枯柳黃塵但古隄。

剡溪道中五首

擬賦歸田未有田。春風聊泛剡溪船。青山滿眼留儂住。處士茅茨阿那邊。
戴家家住此溪頭。買酒尋春得勝遊。夾岸楊花渾似雪。不應興盡便迴舟。
平潮恰恰亂蛙鳴。斷送江南春雨晴。綠穀細看柔眼破。紫茸還見草心生。
心隨天末江波遠。愁似沙津柳帶長。向晚飛花度牆影。半晴煙雨發山光。
抱琴不作王門客。晉代高風只此人。故老底須三上疏。竹林諸子未天真。

隱靜山二首乾道戊子七月旦日題

山鎖松行一逕遙。峰迴樓殿更巖嶺。
飛來雙鶴知何處。只有泉聲下碧霄。
海上蟠桃手自栽。紅塵一墮隔蓬萊。
風帆弱水無由到。乞我當年渡海杯。

狼山

天外奇峰認九華。路人指點是狼牙。
他年刻石題車馬。曾遣山前屬漢家。
初見龜山塔

煙裏微茫第一山。眼明白塔俯滄灣。
塵埃滿面三千里。一笑相看似夢間。

山口道中

芳草連雲水拍溪。春山樹樹子規啼。
東風何事催行客。偏遺殘紅趁馬蹄。

望靈壽致拜祖塋

白馬岡前眼漸開。黃龍府外首空回。
慇懃父老如相識。只問天兵早晚來。

宿石橋聞水聲

野橋曲折渡千回。古寺懸知水面開。
一夜寒聲喧客枕。卻疑風雨轉山來。

洞溪絕句三首

桃李欲開天雨雪。二月山城無奈寒。
賴爾狐裘來送質。更須樽酒放愁寬。

杏花無數連村落。也有人家掛酒旗。春色撩人只供醉。卻怕風吹易醒時。
溪流直傍長堤去。繚亂半山桃李花。極知渡口好春色。卻下扁舟步晚沙。

西湖絕句戲題

淺白深紅幾樹花。波光浮動竹交斜。怪來詩思清人骨。知是西湖處士家。
流水當階山對門。擬尋茅屋住荒村。誰憐九里松間路。猶有人間市井喧。
人道西湖一曲屏。只應真色畫難成。柳隄竹塢無窮意。更著荷花百媚生。

渡河有感

衰衰河流到底黃。誰言一葦便能杭。傷心擊楫無人會。舉酒回頭醉太行。

同翁子功之平江午憩涵山淨慈寺

蘋花吹盡藕花香。日落風生水面涼。淨洗扁舟載明月。共君長嘯飲湖光。

曇花亭供茶戲作二首

問訊高真此住家。伊蒲未辨且煎茶。故應一笑來迎我。五百瓶中總是花。
一聲鐘磬有無中。樓閣山林本自空。不向雲端呈伎倆。猶來盞裏現神通。是夕始聞鐘聲而金燈不現。

夜宿玉虛宮小軒正對步虛峯道士云天寶三年有慶雲見且山呼萬歲始詔建黃帝祠封爲仙都

山敕書今亡

檻外風高霜月明，步虛山裏步虛聲。
罷琴刻燭初長夜，又得人間一夢清。
封禪空餘不死名，華清宮裏望長生。
閒雲強作人間瑞，更有山呼萬歲聲。
龍虎驅馳戰阪泉，荆山鼎就更昇天。
軒轅到處存遺跡，忍使君王不學仙。

溪山堂次韻

溪岸人家高下居，繞溪雲樹雜煙蕪。
故應曲水傳佳句，還喜青松入畫圖。

又溪山堂次韻四首

堂前松竹挺千軍，堂外青山萬馬羣。
橫策時來按文陣，要須筆力起風雲。
漱漱溪光白鳥前，昏昏雨腳暮雲邊。
一年風景君應記，五月來看競渡船。
九衢塵土鬢毛蒼，只有溪山意味長。
但得楓林供欸乃，猶勝斗酒博伊涼。
梅子青青杏子紅，繞城荷葉已掀風。
莫嫌春盡無花柳，猶得清樽阿堵中。

紫極觀二首

小雨輕雲卻解晴，菰蒲衝浪過船聲。
已無桃李占春事，濃綠滿山風更清。
楊柳花飛杏子新，園林無地可留春。
卻尋風雨江邊路，慚愧煙霞物外人。

漢光武廟

涿郡漁陽此路分，用兵諸將總如神。
白頭浪說關中事，鄧禹當年已笑人。

賀子忱抱漆庵二首

紫橐光華穩致身。會看功業上麒麟。
丈人久悞人間世。莫忘他年蕙帳春。
紅覆薰籠錦不如。萬株相倚占春餘。
小牕睡足花陰裏。何似天香下玉除。

釣臺

璜溪亦有釣魚人。一笑鷹揚掃戰塵。
不會先生辭漢祖。投竿深坐此江濱。
答人問易

陰陽妙用表三才。卻問陰陽底許來。
若識陰陽由動靜。何人更作有無猜。

鐵鏡贈仲儼

石門江畔鴈山前。芥室遙知更豁然。
百鍊精明真是鐵。不妨照破野狐禪。

明老惠炭戲以二小詩

雪裏難逢送炭人。地爐炙手便生春。
酸寒東野真堪笑。解道曲身成直身。
道人作喜每逢場。一束烏薪發電光。
便使樽前化紅袖。不妨笑殺許旌陽。

訪吳元鼎如村五首

野竹漫山水漫門。未離城市卻如村。
何須更問柴桑陌。三徑雖寒菊尙存。
我住城南君在西。柴門草長與人齊。
不妨共踏溪津路。日日雲山入杖藜。

經旬泥潦路難乾。煙裏長林雨暗山。常笑詩人愁屋漏。卻思寒士與千間。
昔年曾歎馬相如才氣飄飄賦子虛。未怪家貧徒四壁。先生四壁僦人居。
我生甲子幸君同。君自臞仙我禿翁。要拍銅鞮論歲月。莫嫌相對只詩窮。

史十伯強浮沈市廩自號道人而筆力議論不可掩抑豈隱者耶觀其詩卷贈以絕句二首
未容君識得君詩。添我幽栖一段奇。會有吹噓天上去。沈香亭北要新詞。
頭上塵冠豈易彈。匣中長劍簇中丹。放懷風月真餘事。好向朝廷策治安。

次韻李平叔直舍竹二絕句

寒梢到地不肯屈。迸筍出簷還作行。故應餘韻占風月。要自動節含冰霜。
詩翁愛竹有佳句。詩就移官可奈何。密葉歲寒應更好。賸來和雪看婆娑。

姜特立寄詩編爲賦四首

十年文場未奏功。鶴冠一笑且春容。遙知橫槊荻蘆岸。海闊蛟鼉赴筆鋒。
少年耽句千篇在。老境忘言半偈無。失喜因君還絕倒。但驚寒雀費隋珠。
榕葉青青荔子紅。三山十寺粵王宮。誦君好句渾如畫。寄我清遊夢想中。
宗景文爲工學問。賀方回亦擅詩歌。半山人去東坡沒。妙墨空嗟楣上磨。

重午齋宿讀蔡迨文編以酒饋之

長安米賤不難居。玉署金闈有直廬。指日君王嗟見晚。凌雲誰似馬相如。

沈香亭上未傳宣。斗酒揮毫自百篇。研雪新蒲甌弄碧。遙知獨酌意悠然。

九日送酒與朱元晦

平生愛酒陶元亮。曾繞東籬望白衣。底事秋來猶止酒。重陽須插菊花歸。

老大相望寄一州。故人鄙我倦追遊。應知命駕無千里。惆悵山堂暮雨秋。

航弟自廣潤省墳金華作二絕句送之

族緒彫零不計年。戶曹一眷更蕭然。恨無收斂冠巾計。送汝安心穩坐禪。

烏玄鵠白從來事。兔角龜毛本自無。日用不知何許是。漫言實相與空虛。

送沈信臣赴試南宮五首

山城寒陟夜飛霜。楓葉青紅帶夕陽。夾道梅花有春色。不妨衝雪到錢塘。

僕射吳興自世家。迺翁勸業著金華。似聞玉座詢名字。會伏青蒲掌白麻。

共踏槐花記昔年。一彎新月夜移船。君行爲問靈泉水。夢到松林石壁前。

漫仕雖同官事殊。故人來往未全疎。因君時一論文字。難我窮年困簿書。

吾謀不用可無人。小技文章亦有神。一第區區兒戲耳。請君折取桂爲薪。

次韻石林見貽絕句四首

平昔勳名步玉除。碧油幢下見懸車。定知他日平泉記。不數當年種樹書。
敢從州縣歎徒勞。斗米真成費束蒿。一醉石林巖下月。世間無復武陵桃。
青山白水對開簾。佳句中邊勝蜜甜。機杼由來千丈錦。區區割截笑江淹。
先生德業萬人雄。尋尺猶收爨下桐。乞與朱絃弄流水。坐聽巖壑起松風。

次韻沈明遠春盡書事

街槐園柳綠初連花盡春歸思黯然密葉鳴琴清夢斷白雲雙眼暮山前。

次韻子雲春日雜興五首

馬上還逢江上春。冷煙和雨作紅塵。不堪柳絮催行客。也有桃花似故人。
鶺鴒鳴時春事空。菰蒲葉小未成叢。已拚江草無情綠。不奈山花恣意紅。
瓦盆傾酒未全貧。歲歲田家肯負春。不恨酒醒花落去。花開酒盡最愁人。
綠陰池沼亂鶯流。眼底春來鬢卻秋。不用黃金買白日。待尋三徑作歸休。
山如眉綠畫新就。江似蒲萄始潑醅。收拾風光付佳句。此行嗟我未空回。

又一次韻子雲春日絕句三首

亂離誰意有新春。共醉春盤能幾人。但道沙場無匹馬。便驚羅綺總爭新。
春來殘雪自消簷。只有愁人鬢雪添。未省雙鞬談豹略。且聽紅袖唱香奩。

日月行天自漢家。十年京洛恨無涯。兒童不識鄉園事。競說江南春後花。

次韻子雲寄楊仙姑酒絕句二首

海上冰漿冠八州。舊傳仙姥下層樓。一樽壓倒長安市。白墮青春未解愁。

次韻子雲中秋見寄二首

風雨經時憶對眠。秋聲愁絕雁橫天。未應放卻西樓月。得酒寧須問聖賢。

次韻歌韻

宛宛溪流九曲灣。山猿時下鳥關關。釣磯茶竈山中樂。大隱蒼屏日月閒。

次韻趙文鼎同遊鵝石五首

繚繞雲山溪水南。溪光溶漾滴晴嵐。不知日暖花爭豔。但覺風和酒易酣。

桃花臨水喚人看。花在嶙峋翠石間。莫惜持杯酬爛漫。更須扶杖俯潺湲。

長憶湖山天意新。詔恩大尹宴羣臣。休尋輦轂紛華夢。且作林泉自在人。

漱漱煙波帶月華。渡頭江迴兩三家。細傾社甕鵝兒酒。共聽山村楊白花。

是日社。

幾年家住玉溪頭。乘興時來上釣舟。古寺幽情未曾到。尋春一爲野僧留。

入冬苦雨禱晴幸應劉若訥惠詩爲賀因次其韻

雨餘雲杪澹疎星。老病窺簾眼自明。農事已知今歲好。天公曠放十分晴。
酒難忘處能消日。雨不愁時任戴星。欲和新詩無好語。竹牕燈火夜晶熒。
燈花作喜夜來占。樓角初晴月似鑣。使說市亭新酒美。好風寒日舞青帘。
麥田秋過未休工。穢極如雲白雨中。乞得晴明三十日。披襟可詠快哉風。

次韻鄭守舜舉喜雪四首

好雪相仍歲又除。豐年瑞事總堪書。未嫌款段追千騎。化作張仙跨白驥。
使君仙骨迥無儔。合上瓊樓倒玉舟。雪裏漁蓑詩更好。盛傳僧舍與歌樓。
銀似豪家沒奈何。玉成高壘更巍峩。殘年共擬看三白。酌我從今未厭多。
湘吳醉酣兼衣多。病難禁玉斝飛。月下更期看國艷。凌波那更舞江妃。

鄭守用前韻見示因亦和答四首

臘裏三看雪滿衢。使君當奉十行書。先生屢敝人應笑。泥滑東家許借驢。
九陌歌呼屬後遊。一蓑風景付漁舟。相逢且向南溪看。玉作靈山萬石樓。
振廩糜金氣自和。政聲誰爲勒嵯峨。牛羊壠上飢民絕。鵝鴨池邊勇士多。
天巧由來不露機。冰漸剪出萬花飛。瓊瑤似識漢川女。瑤瑟更逢湘浦妃。

次韻務觀城西書事二首

臘盡雪晴春欲柔。濛濛烟柳認瓜洲。
潮生潮落無窮事。江水東西不限愁。

川搖百艇陸千車。多是淮南避地家。
黃紙赦來戎馬去。兒歌婦笑揔呦啞。

次韻王季夷時同宿蔣山

北山應見太清年。興廢由來亦偶然。
自我得之還自失。老禪刀尺尙相連。
草堂一壑轉山腰。杖策無因隱士招。
蕙帳只應容我老。冷猿孤鶴夜寥寥。
當年丞相讀書林。誰識更張萬事心。
壘上牛羊共回首。插天喬木暮陰陰。

墨梅二首

西北佳人絕代姿。傾城傾國未爲奇。
自然冰雪生顏色。不用人間朱粉施。
影落寒塘月照時。夢爲蝴蝶繞高枝。
畫工欲畫無窮意。不道幽人贍得知。

栽梅

人將粧額半凌晨。天與仙風自絕塵。
歲晚相逢有如此。爲君傳取雪中真。

暉仲惠梅花數枝

霜餘不用怨年華。已有寒梅一兩花。
眼冷故知春意動。瓦鋋終日看橫斜。
莫問南枝與北枝。香幽先與小春期。
直從的喫寒梢數。看到飄零似雪時。

江上春風幾日回。一枝先傍小堂開。恨無冷豔連天白。已有生香特地來。
賸買青春不費錢。眼明江靜月爭妍。詩人每負梅花債。屈指今年第一篇。

蠟梅二首

白璧黃金取意裁。極知變態自江梅。風流一樣香仍好。共趁春前臘後開。
未愜籬東染御黃。天香特地剪蜂房。應憐雪裏昭君怨。洗盡鉛華試佛粧。
燕山道中見桃花

今日風橫車少塵。卷帷聊看塞垣春。已驚漠漠花經眼。也有濛濛絮撲人。
去歲得黟江縣牡丹數種。今年開一枝蓋白者。譜中所謂水晶毬也。
黟江新漾水晶毬。冰雪肌香體更柔。彈壓風光知第一。酴醿玉葉見應羞。

汴都至南京食櫻桃

銀盤日日飽朱櫻。不負歸轅過南京。身到江南梅未熟。故園風味夢關情。

以雙蓮戲韓子師

雨洗風梳兩鬪新。凌波微步襪生塵。真成紅玉嬌相倚。不減昭陽第一人。
並舞連歌意態新。水晶宮裏向無塵。一時風月誰能許。要是君家兩玉人。

種竹

香苞吹盡翠成圍。牆角蕭蕭一徑微。已喜軒牕無俗韻。更憐風月有清輝。

謝陳秀才送詩

偶因借得官書讀。小札于君一向疎。忽寄江湖詩百紙。梅花擔上雪晴初。

用梁士衡韻還鄧器先道中詩卷

夢繞江南雲水鄉。麻姑壇下月如霜。風光景色一千里。都在君家古錦囊。

悼老瓊二首

歌舞相從六換年。秦箏已斷不能絃。荷花滿眼垂楊綠。腸斷清宵月正圓。

江水東流湖水西。水邊花落夢回時。南屏山下風吹土。猶作蕭蕭暮雨垂。

紙鳶

排風決起鬧羣兒。勢力由來一線微。天上鶴鷺徒似耳。卻驚遮日傍雲飛。

廬山霽色

山北山南佛寺開。煙銷日出更崔嵬。讀書誰伴謫仙老。沽酒要須陶令來。

靈隱冷泉

山涵水影兩空明。水到山前百尺清。洞裏臞仙應一笑。抱琴時爲寫寒聲。

南澗甲乙稿卷七

詞

點絳脣十月桃花

木落霜濃、探春只道梅花未嫩、紅相倚、灼灼新粧膩。
莫問仙源、且問花前事、休辭醉、想君園、總是生春
地。

浣溪沙次韻曾吉甫席上

莫惜清樽領客同、已無花伴舞衣紅、強歌歸去莫忽忽。
細雨弄煙煙弄日、斷雲粘水水粘空、酴醿飛下
晚來風。

霜天曉角蛾眉亭

倚天絕壁、直下江千尺、天際兩蛾凝黛、愁與恨、幾時極。
怒潮風正急、酒醒聞塞笛、試問謫仙何處、青山
外、遠煙碧。

前調夜飲武將家有歌霜天曉角者聲調淒婉戲爲賦之

幾聲殘角、月照梅花薄、花下有人同醉、風滿檻、波明閣。
夜寂香透幕、酒深寒未著、莫把玉肌相映、愁花

見也羞落。

菩薩蠻
青陽道中

春殘日日風和雨。煙江日斷春無處。山路有黃鸝。背人相喚飛。
解臺宿酒醒。欹枕殘香冷。夢想小亭東。
薔薇何似紅。

前調蠟梅

江南雪裏花如玉。風流越樣新裝束。恰恰樓金裳。濃熏百和香。
一枝春更多。
分明籬菊艷。卻作粧梅面。無處奈君何。

前調夜宿余家樓聞笛聲

薄雲卷雨涼成陣。雨晴陡覺荷香潤。波影澹寒星。水邊燈火明。
笛聲依夜長。
白蘋洲上路。幾度來還去。欹枕恨茫茫。

前調鄭舉別席侑觴

詔書昨夜先春到。留公一共梅花笑。青瑣鳳凰池。十年歸已遲。
靈溪霜後水。的的清無比。比似使君清。
要知清更明。

前調春歸

牆根新筍看成竹。青梅老盡櫻桃熟。幽牆幾多花。落紅成暮霞。
閉門風又雨。只道春歸去。媚臉笑持盃。

卻驚春思回。

前調葉丞相園賞木犀次韻子師

梧桐葉上秋蕭瑟。畫欄桂樹攢金碧。花底最風流。相逢不上樓。數枝添寶髻。滴滴香霑袂。杯到莫留殘。霧牕疑廣寒。

減字木蘭花雪中集醉高樓

壺中春早。剪刻工夫天自巧。雨轉風斜。吹作千林到處花。瑤池清淺。璧月瓊枝朝夢見。莫上扁舟。且醉仙家白玉樓。

前調次韻趙倅

風梳雨洗。玉闕瓊樓何處是。萬里秋容喚起。嫦娥酒未中。相逢且醉。忙裏偷閑知有幾。況自豐年須信。金華別是天。

訴衷情木犀

疎疎密密未開時。裝點最繁枝。分明占斷秋思。一任曉風吹。金樓細、翠綃乘畫欄西。嫦娥也道。一種幽香。幾處相宜。

謁金門春雪

春尚淺。誰把玉英裁剪。儘道梅梢開未遍。卷簾花滿院。樓上酒融歌暖。樓下水平煙遠。卻似湧金門外。

見絮飛波影亂。

前調重午

幽檻暑又是一年重午。獵獵風蒲吹翠羽。楚天梅熟雨。往事瀟湘南浦。魂斷畫船簫鼓。雙葉石榴紅半吐。情君聊寄與。

好事近辛幼安席上

華屋翠雲深。雲外晚山千疊。眼底無窮春事。對楊枝桃葉。老來沈醉爲花狂。霜鬢未須鑄。幾許夜闌清夢。任翻成蝴蝶。

前調鄭德輿家留飲

秋意滿芙蓉。紅映小園叢竹。風裏鳳簫聲颺。有新粧明玉。詩翁相對兩悠然。一醉繞黃菊。目盡晚山橫處。共修眉爭綠。

秦樓月次韻陳子象

鶯聲寂。春風欲去難蹤跡。難蹤跡。幾枝紅藥。萬金消得。青銅鏡裏朱欄側。照人也似傾城色。傾城色。一樽莫負賞心良夕。

清平樂辛丑重陽日劉守招飲石龍亭追錄

危亭崛起臥蒼龍。絕景畫圖中。便作龍山高會。千年樂事能同。使君晏處丹楓影淡黃花香濃。不惜歸

鞍照月、直教破帽吹風。

賀聖朝送天與

斜陽只向花梢駐。似愁君西去。清歌也便做陽關。更朝來風雨。佳人莫道一杯須近。總眉峯偷聚。明年歸詔上鸞臺。記別離難處。

西江月閨重陽

一度難逢佳節。今年兩度重陽。菊花猶折御衣黃。莫惜危亭更上。況有飛觴灑玉。從教醉帽吹香。興來相與共清狂。頻把新詞細唱。

前調春歸

山路冥冥雨暗。溪橋陣陣花飛。一年寂寂又春歸。白髮自驚塵世。不惜障泥渡水。且尋團扇題詩。杜鵑休繞暮煙啼。我欲風前重醉。

燕歸梁木犀

涼月圓時翠帳深鎖。非霧沈沈廣寒宮裏未歸人。共結屋住黃金。繁枝未老秋光淡。好風露、總關心。天香不奈遠相尋。更剪巧上瑤簪。

南柯子次韻姚提點行可席上見賜

急雨朝來過。濃雲晚半收。荷香便傍酒樽浮。極目淡煙斜照。滿芳洲。消盡人間暑。翻成一段秋。使星南

楚轉東甌。只恐禁林歸詔。未容留。

前調廣德道中遇重午

野杏摶枝熟。戎葵抱葉開。村村簫鼓畫船回。客裏不知時節。又相催。角黍堆冰碗。兵符點翠釵。去年今日共傳杯。應燃榴花獨立。望歸來。

浪淘沙覺度寺

席地賞殘紅。少駐孤蓬。一春不奈雨和風。雨自無情風有恨。花片西東。雲澹遠峯濃。綠遍高桐。神仙知在此山中。萬古消凝多少事。目盡晴空。

前調趙富文席上

倦客怕離歌。春已無多。閑愁須倩酒消磨。風雨幾晴。今夜月不醉如何。玉筍灑金荷。情在雙蛾。二年能得幾經過。花滿碧溪歸棹遠。回首煙波。

前調芍藥

鶼鶼怨花殘。誰道春闌。多情紅藥待君看。濃淡曉粧新意態。獨占西園。風葉萬枝繁。猶記平山五雲樓。映玉成盤。二十四橋明月下。誰凭朱欄。

鷓鴣天雪

山繞江城臘又殘。朔風垂地雪成團。莫將帶雨梨花認。且作臨風柳絮看。煙杳渺。路瀰漫。千林猶待月

爭寒憑君細酌。羔兒酒，倚遍瓊樓十二欄。

前調九日雙溪樓

不惜黃花插滿頭。花應卻爲老人羞。年年九日常拚醉，處處登高莫浪愁。

初浮多情雨後雙溪水，紅滿斜陽自在流。

前調九日登赤松絕頂

老去休驚節物催。菊花端的爲人開。攜壺幸有齊山客，懷古還如單父臺。

松掩映、水縈回。使君強健得重來。不須細把茱萸看，且盡豐年酒一杯。

虞美人送韓子師

西風斜日蘭臯路。碧嶂連紅樹。天公也自惜君行。小雨霏霏，特地不成晴。

滿城桃李春來處。我老君宜住。莫驚華髮笑相扶。記取他年同姓兩尙書。

前調懷金華九日寄葉丞相

登臨自古騷人事。慘慘天涯意。金華峯頂做重陽。月地千尋，風裏萬枝香。

醉雙溪明月亂山青。飛夢時時猶在最高亭。

前調七夕

煙霄脈脈停機杼。雙鵠飛來語。踏歌聲轉玉鉤斜。好是滿天風露，一池花。

離多會少從來有。不似人間

久歡情誰道隔年遲。須信仙家日月未多時。

前調葉夢錫園十月海棠盛開

詔書昨夜催春到。綠野花爭早。幾枝先見海棠開。全勝隴頭衝雪寄江梅。
睡萬紅千紫莫嫌遲。看取滿城花送袞衣歸。破寒滴滴嬌如醉。不比春饒。

夜行船再至東陽有歌予往歲重九詞者戲爲賦之

極目高亭橫遠岫。拂新晴黛蛾依舊。策馬重來秋光如晝。霜滿翠梧高柳。
時重九。樓上清風溪頭明月。不道沈郎消瘦。

南鄉子龍眼未聞有詩詞者戲爲賦之

江路木犀天。梨棗吹風樹樹懸。只道荔枝無驛使。依然贏得驪珠萬顆傳。
筵驚走梧桐雙睡鵠。應憐腰底黃金作彈圓。

前調中秋前一日飲趙信申家

細雨弄中秋。雨歇煙霄玉鏡流。喚起佳人橫玉笛。凝眸收拾風光上小樓。
爛醉判扶頭。明日陰晴且漫愁。二十四橋何處是。悠悠忍對嫦娥說舊遊。

醉落魄務觀席上索賦

樓頭晚鼓佳人莫唱黃金縷。良宵燈火還三五。腸斷扁舟明日江南去。
離觴欲醉誰能許。風前蝶鬧蜂

兒舞。明年此夜知何處。且插梅花、同聽畫簷雨。

前調戊戌重陽龍山會別

菊花又折今年真。是龍山客。杯行激灑新醅白。一醉相歡莫便話離惻。從教破帽頻欹側。樓頭霜樹明秋色。憑高待把疎星摘。天近風清不怕暮雲隔。

一剪梅葉夢錫席上

竹裏疎枝總是梅。月白霜清猶未全開。相逢聊與著詩催。要趁金波滿泛金盃。多病慚非作賦才。醉到花前探得春回。明年公已在鸞臺。看取春風丹詔重來。

臨江仙次韻子雲中秋

記得年時離別夜。都門強半清秋。今年想望只鄰州。星連南極動。月滿大江流。芸閣老仙多妙語。雲階清夢曾遊。屐聲還認庾公樓。金波搖酒面。河影墮簾鉤。

前調寄張安國

自古文章賢太守。江南只數蘇州。而今太守更風流。熏香開畫閣。迎月上西樓。見說宮粧高髻擁。司空卻是遨頭。五湖莫使具扁舟。玉堂紅藥在。還勝百花洲。

江神子建安縣戲趙德莊

十年此地看花時。醉題詩。夜彈碁。湖海相逢。曾共惜芳菲。前度劉郎今度客。嗟老矣。鬢成絲。江梅吹盡。

柳橋西雪紛飛。畫船移滿眼青山。依舊帶寒溪。往事如雲無處問。雲外月也應知。

前調金山會飲

金銀樓閣認蓬萊。曉煙開上崔嵬。風引孤帆誰道卻船回。鵬翼倚天鼈背穩。驚浪起。雪成堆。翩翩黃鶴爲誰來。醉持杯共徘徊。四面江聲腳底隱。晴雷織女機頭憑借問。何處更有瓊臺。

滿江紅丁亥示龐祐甫

梅欲開時君欲去。花誰同折應悵望。江津千樹晚煙明。雪花似故人相見好。人如塞鴈多離別。待留君重看水邊花。花邊月。臺城路。山如闕。追往事。傷時節。但春風春雨古人愁絕。多少揚州詩興在。直須清夢翻蝴蝶。問他年誰記飲中仙。花應說。

前調自鹿田山橋小集潛嶽寺坐中酬陳子象詞

寂寞山城春已半。好花都折無奈向。陰晴不定冷煙寒食莫問花殘風又雨。且須爛醉酬春色。歎使君華髮又重來。人應識丹井畔。山橋側。空翠裏。煙如織。便直教馬上醉巾霑濕丞相車茵端未惜。孟公好客聊爲客。算明年溪路海棠開還相憶。

前調再至丹陽每懷務觀有歌其所製者因用其韻示王季夷章冠之

江繞層城重樓迴。依然山色有佳人。猶記舊家離別。把酒只如當日醉。插毫牋欠樽前客。算平林有恨寄傷心。煙如織湖平樹花連陌。風景是光陰易歎新聲渾在。斷雲難覓暮雨不成巫峽夢。數峯還認湘波

瑟但與君同看小槽紅、真珠滴。

水調歌頭席上次韻王德和

世事不須問、我老但宜仙。南溪一曲、獨對蒼翠與孱顏。月白風清長夏、醉裏相逢林下、欲辨已忘言。無客問生死、有竹報平安。少年期功名事、覓燕然。如今憔悴、蕭蕭華髮抱塵編。萬里蓬萊歸路、一醉瑤臺風露、因酒得全天笑指雲階夢。今夕是何年。

前調七月六日與范至能會飲垂虹是時至能赴栝蒼予以九江命造朝至能索賦

江路曉來雨、殘暑夜全消。人言天上今夕飛鵠漸成橋。杳杳雲車何處、脈脈紅蕖香度、瓜菓趁良宵。推枕斷虹卷、撫檻白魚跳。五湖客、臨風露、倚蘭苕。雲濤四起、極目人世有煙霄。我送君舟西渡、君望我帆南浦、明日恨迢迢。且醉吳淞月、重聽浙江潮。

前調寄陸務觀

明月照多景、一話九經年。故人何在、依約蜀道倚青天。豪氣如今誰在、牚對岷峨山水落紙起雲煙。應有陽臺女、來壽隱中仙。相如賦、王褒頌子雲玄。蘭臺麟閣早晚飛詔下、甘泉夢繞神州歸路、却趁雞鳴起舞、餘事勒燕然。白首待君老、同泛五湖船。

前調次韻子雲惠山見寄

激激桂華滿、搖落楚江秋。去年今夜、相望千里一扁舟。滿目都門風露、離別淒涼幾度、霜雪漸盈頭。山水

最佳處、常恨不同遊。少年約、談笑事、取封侯。田園歸晚、休問適不用吾謀。身外功名何處、屈指如今老去、無夢到金甌。賸買五湖月、改笛下滄洲。

前調水洞

今日我重九、莫負菊花開。試尋高處攜手、躡屐上崔嵬。放目蒼巖千仞、雲護曉霜成陣、知我與君來。古寺倚修竹、飛檻絕纖埃。笑談間、風滿座、酒盈杯。仙人跨海、休問隨處是蓬萊。洞有仙骨巖落日平原西望鼓角秋深悲壯、戲馬但荒臺。細把茱萸看、一醉且徘徊。

前調雨花臺

澤國又秋晚、天際有飛鴻。中原何在、極目千里暮雲重。今古長干橋下、遺恨都隨流水、西去幾時東。斜日動歌管、萸菊舞西風。江南岸、淮南渡、草連空石城。潮落寂莫、煙樹鎖離宮。且鬪樽前酒、美莫問樓頭佳麗、往事有無中。卻笑東山老、擁鼻與誰同。

前調和龐祐甫見寄

落日澹芳草、煙際一鷗浮。西湖好處、君去千里爲誰留。坐想敬亭山下、竹映一溪寒水、飛蓋共追遊。況有樽前客相對、兩詩流。笑談間、風滿座、氣橫秋。平生壯志、長嘯起舞看吳鉤。紅白山花開謝、半醉半醒時節、春去子規愁。夢繞水西寺、回首謝公樓。

聽清歌初轉翠嶺雲橫乍飛還駐水落秋明正千巖呈露況有賓朋飄然才調盡凌空鶴鷺步繞西疇同尋南澗郊原新雨好客聲名鄭莊風韻松菊栽成故侯瓜圃燕去鴻來笑人生離聚老子偷閑愛君三徑共一樽芳醑待約梅仙他年丹就騎鯨飛去

念奴嬌中秋攜兒輩步月至極目亭寄懷子雲兄

去年秋半正都門結束相將離別激激雙溪新鴈過重見當時明月步轉高樓淒涼看鏡綠鬢紛成雪晚晴煙樹傍人飛下紅葉還記江浦潮生雲濤天際涌金波一色千里相望渾似夢極目空山圍碧醉拍朱欄滿簪丹桂細與姮娥說倚風孤嘯恍然身在瑤闕

前調再用韻答韓子師

定交最早歎西津幾度忽忽論別世事浮雲山萬變只有滄江橫月長憶追隨湖山好處醉帽欹風雪竹陰花徑興來題蓋桐葉誰憶此地相逢鬢毛君未白眉添黃色屈指煙霄歸詔近路入龍樓金碧千載功名一樽歡笑會作他年說倚天長劍夜寒光透銀闕

前調次陸務觀見貽念奴嬌韻

湖山泥影弄晴絲目送天涯鴻鵠春水移船花似霧醉裏題詩刻燭離別經年相逢猶健底恨光陰速壯懷渾在浩然起舞相屬長記入洛聲名風流觴詠有蘭亭脩竹絕唱人間知不知零落金貂誰續北固煙鐘西州雪岸且共杯中綠紫臺青瑣看君歸上羣玉

前調又次韻

春來離思、正樓臺燈火、香凝金戟。楊子江頭嘶騎擁、楊柳花飛留客、枚乘聲名、謫仙風韻、更賦長相憶。酒闌相顧、起看月墮寒壁。樽前誰唱新詞、平林真有恨、寒煙如織。燕鴈橫空梅葉亂、醉裏隔江聞笛、白髮逢春、湖山好在、一笑千金直待君歸詔、買船重話疇昔。

水龍吟 溪中有浣衣石

亂山深處逢春、斷魂更入桃源路。雙雙翠羽、濺濺流水、濛濛香霧、花裏鶯啼、水邊人去、落紅無數。恨劉郎鬢點星星、華髮空回首、傷春暮。寂寞雲間洞戶、問當年佳期何處。虹橋望斷、瓊樓深鎖、如今誰住。綠滿千巖、浣衣石上、倚風凝盼、料多情好在、也應笑我、卻忽忽去。

前調夜宿化城得張安國長短句戲用其韻

五溪深鎖煙霞、定知不是人間世。軒然九老、排雲一笑、蒼顏相對、星斗垂空、月華隨步、酒醒無寐。廣寒已近、嫦娥起舞、天風動搖丹桂、極目層霄如洗。正千巖稜稜霜氣、飛泉半落、蒼崖百仞、珠翻玉碎、金衲松成、葛洪丹就、如今千載、歎謫仙詩在、騎驢未遠、且留君醉。

瑞鶴仙 送王季夷

西風吹暮雨、正碧樹涼生、送君南浦。蟬聲帶殘暑、滿高林斜照、暝煙橫渚。故鄉路阻、更秋入江城、鴈度悵天涯、幾許閑愁、對酒共成羈旅。休問功名何在、綠鬢吳霜、素衣塵土、離觴緩舉、收玉筯、聽金縷、歎凌雲

才調、烏絲欄上、省把清詩漫與見洛陽、年少交遊、倩君寄語。

薄倖送安伯弟

送君南浦、對煙柳青青萬縷、更滿眼殘紅吹盡、葉底黃鸝自語、甚動人多少離情、樓頭水闊山無數、記竹
裏題詩、花邊載酒、魂斷江干春暮、都莫問功名事、白髮漸星星如許、任雞鳴起舞、鄉關何在、憑高目盡、
孤鴻去漫留君住、趁酴醿香暖、持盃且醉瑤臺露、相思記取、愁絕西牕夜雨。

南澗甲乙稿卷八

表

賀冊寶禮成尊號表

天地明察昭舜孝之無違日月光華慶堯齡之有永鴻稱大備喜氣橫流臣聞極天下以事親斯啓安榮之運本人心而御治茲爲仁壽之基洪惟慈闡膺萬歲之期實繫聖君寵四海之化惟動不應不顯其符隆大德必得之名鏤彌文于寶牒紀泰元增受之策崇嘉號于法宮恭惟皇帝陛下道際堪輿恩霑動植歎均海宇不遺小國之臣禮盛天正亦尙一人之慶然而身濟大業躬行至仁視膳問安匪徒區區曾閔之事勝殘去殺共推赫赫禹湯之明是宜尼父之從心遂見周王之復古臣屬嬰符竹阻望宸楓帝夢無疆豈但同符于文武邦儀曠舉真成度越于漢唐

賀太上皇帝表

九州致養坐凝景命之申七政呈祥運格宸心之縱光增典冊慶溢家邦恭惟尊號陛下若聖與仁能寬而惠功成白水邁建武三十二年道備崆峒陋廣成千二百歲脫屣萬機之重怡神五閏之餘宜膺睿算之無窮豈視歷經而可紀神妃儼極共披金匱之書聖子當陽長奉玉卮之壽臣屬拘職守阻造闕廷帝

堯蕩蕩以難名。第切康衢之頌。周王勉勉而壽考。彌瞻雲漢之章。

賀太上八十受尊號冊皇帝表

臣某言伏覩詔書加上光堯壽聖憲天體道性仁誠德經文緯武紹業興統明謨盛烈太上皇帝壽聖齊明廣慈備德太上皇后尊號冊寶者玉卮稱壽儼二紀之升平寶冊增名伸兩宮之大慶禮嚴八秩歡動九圍臣聞惟舜事堯斯啓髦期之祉若文與武式彰夢帝之祥考載籍之攸傳歷漢唐而未覩於昭聖代肆舉上儀一生二二生三肇炎緒之符于有永萬取千千取百迪慈闡之算于無疆一時並上于鴻稱嗣歲咸新于縟典恭惟皇帝陛下系隆本始德邁永平蒞中國而撫四夷將整渭橋之駕坐明堂而朝羣后益表雲臺之功而乃製龍袞以下同老萊之衣調神鼎而躬致天下之養實爲盛事彌介萬年臣屬領真祠阻趨觀闈福延宗社久知上帝之顧歆惠及昆蟲更納斯民于仁壽

賀太上皇帝尊號表

臣某言伏覩詔書皇帝帥羣臣詣德壽宮〔案〕宋史高宗稱德壽宮加上光堯壽聖憲天體道性仁誠德經文緯武紹業興統明謨盛烈太上皇帝尊號者膺受命之符久熙神于物外增泰元之策爰加號于域中掩載籍以彌高洽華夷而共慶竊以期頤在宥自堯舜而有聞壽考途中歷漢唐而未見況脫屣而安天下之養垂衣而與造物者遊王則次春御常珍于嗣歲孫又有子子貽不緒于本支斯惟無得而名是爲必得其壽恭惟光堯壽聖憲天體道性仁誠德經文緯武紹業興統明謨盛烈太上皇帝陛下好生本天

地之大德。寢兵成帝王之極功。三十六年。躬行慈儉之寶。萬有千歲。力致太平之基。宜典冊之屢書。與皇圖而俱永。臣欽奉盛際。屬領外祠。九賓臚傳。雖莫奏甘泉之頌。百神率舞。第惟伸嵩嶽之呼。

會慶節賀表

良月就益。夙啓誕彌之旦。五星來聚。聿迎元命之年。宗社騰輝。華夷協慶。恭惟皇帝陛下。恩沾動殖。道貫堪輿。體虞舜之無爲。懋介兩宮之祉。秉周文之至德。益深四表之歡。策增授于泰元。禮獨行于昭曠。本支百世。已觀孫子之施。壽考萬年。將見帝王之冠。臣久叨祠館。阻造闕廷。六樂成儀。莫預鈞天之宴。九賓在望。第聞嵩嶽之呼。

聖神出震。凝寶命于昊天。歷數紹堯。啓昌辰于良月。乾坤薦祉。夷夏騰歡。恭惟皇帝陛下。大德好生。休功不殺。孝悌而光四海。恭儉以屏五兵。治格文明。將繼六經而七祥。開壽嘏允膺萬歲之三。臣屬領祠庭。阻趨觀闕。雖田穀之仰膏雨。莫謝于生成。若澤葵之傾太陽。彌深于頌禱。

神聖健生。昭格熙平之運。乾坤錫羨式彰。震夙之辰。海嶽騰歡。華戎共慶。恭惟皇帝陛下。明並日月。功光祖宗。整法駕于圜丘。彌文嗣舉。奉慶儀于前殿。載籍未聞。舊傳河水之清。茲見壽星之會。臣屬叨詞館。遙睇闕廷。莫陪嵩嶽之呼。恭趨盛旦。第切華封之祝。益介萬年。

千齡啓運。於昭上聖之生。萬歲成純。式副下民之禱。昆蟲閭懼。海嶽歡呼。恭惟皇帝陛下。勇知表邦。寬仁御世。體乾无之用。九萬化默成。法離照之繼明。四方咸乂。候祥輝于良月。增神筴以後。天臣屬假鑾符。阻

趨觀闕。續天地之頌。莫追考父之能。賡立極之謠。第切封人之願。
生商定位。仰神聖之挺生。日月光華。驗基圖之復旦。四方來賀。萬國咸寧。恭惟皇帝陛下。陟禹之迹。誦堯
之言。通孝悌于神明。惟勤不應。成安強于道德。未占有宇。載臨震夙之辰。益著升平之象。體太極之三爲
一功。卽混于華戎。膺眉壽之萬有千。治彌高于今古。臣猥叨祠秩。阻造廷紳。擊壤歡呼。第切康衢之頌。稱
觴忭舞。如聞嵩嶽之呼。

昊天成命。有開載夙之祥。良月就盈。益仰誕彌之節。照臨所被。鼓舞惟均。恭惟皇帝陛下。勇智以表萬邦。
神明而光四海。政刑修于閒暇。不昭有截之威。道德成乎安強。共介無疆之壽。茂建系隆之業。聿臻恢復
之期。臣徒深望日之誠。莫預造廷之慶。紹登封之七十一。俯觀世祖之成功。膺歷數之萬八千。仰繼天皇
之盛際。

占履武之祥。序開良月。紀流虹之旦。慶及溥天。莫酬在宥之恩。共上無疆之祝。恭惟皇帝陛下。不承武烈。
重協帝華。修車馬以會東都。聖功可待詰。戎兵而陟禹迹。德政用修。治四表之歡聲。介萬齡之眉壽。臣屬
拘祠館。阻造宸廷。奉百末之觴。魚龍在望。上千秋之鑑。葵藿傾心。

祥開良月。占五星聚井之期。慶浹寰區。啓大電繞樞之旦。乾坤不應。宗社延洪。恭惟皇帝陛下。睿智以有
臨。常德以立。武會期長樂。聿求萬國之歡。獻獲大安。坐式九圍之命。懋建隆平之業。於昭震夙之辰。合二
氣于無窮。凋三光而不老。臣叨塵從橐。久去宸廷。履土戴天。莫罄華封之祝。望雲就日。第增嵩嶽之呼。

天申節賀表〔案〕宋史高宗生辰名天申節

紹炎圖于三紀。久釋萬機。嚴端節于千秋。茂迎八秩。祥占嵩嶽。喜溢康衢。恭惟尊號。德輔至仁。功高再造。怡神物外。自得逍遙之遊。玩意域中。不遺慈儉之寶。仰聖子神孫之共慶。宜普天率土以均歡。臣屬領真祠。阻趨觀闕。候如復旦。驗神光七十五來。禮盛祈年。頃眉壽萬有千歲。

中天紹復。漢儀莫盛于兩京。垂拱耄期。堯壽特高于五帝。祥占星火。喜溢康衢。恭惟尊號。道大難名。功成不處。不謨與子。無憂亶惟。文王好生在民。盛德孰加虞舜。脫屣萬機之外。怡神四海之尊。八千歲爲春。坐溪河清之運。九萬里而上行。觀輿地之歸。臣久去班聯。尙靡祠秩。仰房心之叶瑞。莫遂窺瞻。驗箕翼之齊輝。第深忭舞。

九州致養。仰太極以居尊。四表騰歡。慶誕彌之紀節。恭惟尊號。功成不宰。道妙難名。跡並商周。茂建中興之烈。粧視堯舜。猶全高蹈之風椿齡。迎八秩之祥。天壽啓萬年之永。臣叨塵從橐。阻造宸廷。驗火德之重明。徒深獸舞。祝乾符之增授。第切嵩呼。

道契崆峒。甫迪期頤之慶。光凝華渚。式昭載夙之祥。燕及敷天。歡騰萬國。恭惟尊號。功高漢祖。仁並唐堯。踰建武三十二年。授之聖子。迎天皇萬八千歲。重見神孫。倬然壽考之符。信矣古今之冠。臣屬拘祠秩。阻造闕廷。出丙入丁。共仰星躔之極。先庚後甲。益知帝命之申。天命不顯其符。久格系隆之運。大德必得其壽。式昭震夙之辰。夷夏均歡。人神共慶。恭惟尊號。功超邃古。

治復承平再造不基陋漢唐其培塿允恭大業儼堯舜猶粃糠方觀累洽以重熙自得長生而久視後乾坤而不老膺歷數以無窮臣猥竊真祠阻趨宸陛仰鎬京之燕惟深葵藿之傾聯嵩嶽之呼第切昆蟲之擇

進銀絹表

萬機脫屣仰崆峒訪道之辰四海貢珍盛華渚呈祥之旦虔修方物恭寘大庭前件銀絹美異昆田實諸文籞不腆敝賦敢爲宰旅之歸無疆惟休共上封人之祝

賀太上皇帝表

堯舜在上紹成復古之勳任姒比隆共格齊天之算禮新一代慶洽萬方竊以日候再中故月承而有耀乾元用九茲坤順以無疆仰泰皇迎增壽之祥乃柔極兆同休之慶道均不老理合自然恭惟尊號太上皇帝陛下脫屣怡神握符御世文王之與聖子旣共保于鴻基帝譽之有元妃宜並申于寶命肆差春旦繼舉盛儀靡煩八駿之馳坐致七桃之獻臣屬嬰祠秩久去宸廷聽九成之簫韶第想雲龍之會祝萬歲之眉壽徒殫葵藿之誠

太上皇帝慶壽禮成賀表

慈闡介壽亘古未聞盛禮告成普天同慶恭惟尊號太上皇帝陛下仁參高厚道冒華戎克遜成功父子自侔于堯舜系隆底豫君臣未數于商周屬茲萬歲之期翕受四方之賀啓祥輝于南極候淑氣于東郊

不踰矩以從心既驗降年之有永強爲名而字道益知受命之無疆臣屬守蕃宣阻趨象魏歌卿雲之爛備聞海岳之歡受神筴之增更仰日星之紀

皇帝賀表

慶集堯庭仰聖人之得壽禮行漢殿知天子之有尊宗社增輝華夷受福恭惟皇帝陛下守先王之要道備中國之至仁法地法天叶寧神于無外盡倫盡制極養志而不違當慈闡膺獻歲之祥實睿算擬傳家之喜占斗牛之王氣盛事冠于百王會日月于壽星歡聲騰乎四表臣適叨郡寄阻望國光莫陪洛下諸生作受命中興之頌尚與海隅父老詠蒸民立極之詩

太上皇后七十賀皇帝表

千齡紀運式昭帝載之隆七秩迎年更上母儀之慶歡騰海宇喜溢宮庭竊以漢興而尊太公媼后不書于長樂堯老而授大舜女皇莫著于平陽惟一時並養于宸闈且二聖聯躋于睿算在今甫見亘古未聞恭惟皇帝陛下齊日月之運行事天地以明察垂衣拱手而致化道嘗合于兩儀問安視膳于無違教旣刑于四海金簡同開于壽歷玉卮益奉于慈顏臣逖遠從班欽聆盛典宴西池而歌黃竹小融融洩洩之詩禮南岳而倡卿雲美蕩蕩巍巍之治

孝慈淵聖皇帝上懇慰表代倉司

佳兵罷警方期鑾輶之還遠使來庭遽告龍髯之斷哀纏宸極痛浹寰區伏以孝慈淵聖皇帝潛德春宮

天下陰受其賜承休寶位生民無得而稱蓋仁孝本于自然慈儉存于先務蒙塵三紀阻覲萬方合文王之明夷固已行乎患難有高宗之無逸曾未享于春秋恭惟皇帝陛下坐致平康躬修悌順東朝遠養纔歲月之僅周北顧在原何禍災之荐至音容遂邈聖情難居臣適以使事在遠不獲奔赴闕廷云云

太上皇帝慰表

中壺貽災遽失婦容之順慈闡軫念諒同子聖之悲恭惟光堯壽聖太上皇帝陛下脫屣萬機頤神四表雖自家刑國宜俯記于內朝而制禮緣情願稍寬于聖慮

太上皇后慰表

母道遵臨方嚴慶養婦儀奄隔遽軫慈懷恭惟壽聖太上皇后殿下厚德承乾至明儼日顧徽音之欲嗣恨柔範之莫還願寬中節之哀以副從宜之禮

皇帝慰表爲皇后上仙

災延椒掖悲動楓宸凡在照臨舉深愴慕伏以大行皇后化行恭儉德茂柔嘉正九御之盛儀悵焉未久助兩宮之大養倏爾不終恭惟皇帝陛下治極寧親功深御宇願抑倪天之感俯從率土之祈

又爲皇太子薨

前星失次少海沈輝痛極本支悲纏寰宇恭惟皇帝陛下治功日起齒德天開宮掩長秋顧哀悰之未遠苑空博望乃變故之荐臻願思付託之隆少抑哀慈之念

太上皇帝慰表

國有神孫方啓重輝之盛。天開聖緒乃貽大本之憂。恭惟尊號備王者之無私。膺天下之至養。甲觀占夢。茂迎四世之祥。綠車在廷。遽有一朝之感。願益觀于道化。庶少抑于聖情。

太上皇后慰表

主器占憂。遂虛儲禁。含飴興起。倍軫慈衷。恭惟尊號體備仁榮。躬行儉實。眷此重明之照。夙昭大慶之符。帝祉未施。天災遽有。願抑悲思之感。益綏壽履之康。

知婺州到任謝表

入塵法從歲踴。悅閱于再周。出假使蕃。道路僅更于數舍。仰體曲成之眷。敬宣寬大之恩。伏念臣知力不能踰人。學術無以異衆。才疎意拙。少嘗粗志于功名。心折氣摧。晚實重傷于憂患。豈謂衰頹之朽質。寢蒙特達之聖知。始寓直于掖垣。旋參華于選部。文惟骫骫。屢承褒袞之加。議本憲恩。悉荷威顏之假。感洪慈之未報。揣微分而敢安顧此東陽。今爲輔郡。財殫粟匱。適遭饑饉之餘。訟劇政繁。尤重藩宣之委。孰云孱懦可副選倫。此蓋恭遇皇帝陛下。躬慈儉以保邦。體寬仁而御下。謂臣早更州縣。或知撫字之方。憐臣久侍禁嚴。備識憂勤之意。責之列職。寵以分符。敢效昔賢。樽俎但期于賦詠。庶幾漢吏里閭稍遂于奠安。

再知婺州到任謝表

冠西清之美職。已冒殊恩。分太末之名邦。仍叨舊治。稍違行闕。卽屆部封。伏念臣少嘗竊慕于古人。晚始

親逢于聖主。豈謂迂疎之質。遂蒙特達之知。造膝而貢狂愚。旣屢嘉其一得。披肝而導志慮。曾何補于萬分。罔知歲月之遷。寢荷寵靈之異。昨膺召節。誤長從班。孰云銓敕之平。益愧論思之謬。葵藿徒知向日。忍負寸心。犬馬猶有戀軒。敢懷去意。第每虞于譏議。仍滋懼于滿盈。自詭爲州。實惟報上。況滋寶婺。特近太微。地竊重臨。治行靡追于黃霸。時容著詠。郊居肯慕于沈侯。祇佩眷私。若爲稱塞。此蓋恭遇皇帝陛下。德參天地。道冒華戎。泰和在于唐虞。肅臣工而器使。仁風慰于黎庶。擇守令以布宣施。及妄庸荐加優渥。臣敢不恪求民瘼。寅奉藩條。官聯喉舌之司。顧敢忘于左右。郡亦股肱之寄。誓益告于謀猷。

謝賜寬恤手詔碑表

宸恩寬大。衣被于羣黎。睿藻昭回。照臨于萬寓。承休甚寵。拜命惟新。竊以方國賜書。本建武中興之盛事。爲民下詔。實孝文務養之深仁。於鑠聖時。兼休二代。恭惟皇帝陛下。道侔天地。德紹祖宗。功烈無前。孝治驩騰于四表。嘉祥荐至。豐年屢格于萬邦。憫茲穀賤之或傷。尙致戶輸之過。取賜頒寶墨。申戒攸司。粲然雲漢之垂。穆若春陽之布。臣濫糾州組。躬受詔函。周賦有常。距敢多于什一。堯言在上。庸知告以再三。

辭知建寧府表

右臣准尚書省劄子。十二月三日。三省同奉聖旨。差臣知建寧府。不候授告。疾速前去之任。候任滿前來奏事者。臣欽聞成命。愧懼無任。伏念臣以至愚極陋之質。荷上聖特達之知。擢寘三銓。已乏論思之效。試守一郡。迄無善最之稱。徒知奉行寬大。以拊摩饑饉之餘。不慮自貽曠獫。而招致悔尤之積。懇祈散地實

微分之攸宜以畀使藩匪私心之敢望況建寧之鉅鎮本潛躍之名區雖異時嘗叨宰字之官豈今日遂有鎮臨之幸已試無狀啓處不遑伏望皇帝陛下遴選循良布宣德意俾內外咸舉其職思小大務盡其才寵以真祠庶少安于庸懦假之歲月斯曲示于保全臣無任瞻天望聖激切屏營之至所有恩命未敢祇受臣除已交割婺州職事以與次官一面起離前去衢信州聽候指揮外謹錄奏聞伏候敕旨

知建寧府到任表

瀝懇籲天莫遂請閒之願疏恩易地仍叨共理之榮優假至深凌兢罔措伏念臣奮身疎遠遭世盛明入參侍從之華每蒙異眷出領藩宣之寄曾乏微庸況歲月之僅周積過愆而靡逭孤蹤易毀寧分近甸之憂全度兼容特畀潛藩之重眷茲建水實控閩陬代藉初基覺谿山之改觀宦游寢老慨民社之嘗臨雖馳驅頗愧于壯年然委付有光于前日此蓋恭遇皇帝陛下惠綏羣獻明燭高微器使人才舉絕重輕之弊衡持天下悉無內外之殊不遺菅蒯之微尙費乾坤之造轉其迂鈍錫以便安臣敢不仰體曲成益思盡瘁土風末俗猶粗識其二三利澤深仁或布宣于萬一

謝降官表

外臺撫戾難逭于深文中詔施仁第從于寬典恩隆命薄感極涕零伏念臣猥以庸材叨塵輔郡野無青草適歲事之荐饑戶有犀渠復土風之善競慨疲驚之既竭慚尺寸之罔功財貨未贏陽城之政甚拙教條靡善延壽之過自知至于報應或繆于文移請獄務伸于法令重貽刺舉宜在譴訶羸瓶之寘井渭蓋

有擠而甚者.弊車之避道左.是宜麾而去之.敢期覆燾之深曲示保全之厚.就移職守.特損官聯.此蓋恭遇皇帝陛下湯網務寬.舜璣惟察.念臣久更州縣.常自信其迂愚.憐臣昔侍禁嚴.每洞知其拙直.刑于善貸責.以後來.臣敢不仰副殊私益.堅素履.雖桑榆之收暮景.莫知補報之方.若葵藿之傾太陽.尚有糜捐之所.

謝放罷表

彈文甚峻.請從流放之科.宸度兼容.聊示汰歸之譴.恩深命薄.感激涕零.伏念臣猥以非才.叨塵異眷.文詞淺拙.嘗蒙甚善之褒.議論闊疎.屢動蓋高之聽.久冒清華之選.皆繇特達之知.昨自典銓.復求試郡.與之舊治.曾無數舍之勞.課以字民.尙乏期年之効.徒以世霑厚祿.身忝從班.稍知粗抑于豪強.不敢遽形于退避.明日張膽.期法令之是行.銷骨鏘金.乃謗傷之遂積.果貽清議.上負明時.然臣被拔擢于州縣者餘二十年.荷委任于朝廷者更十數職.寵爲過分.嗟有識之自知.貪以徇私.慨無從而可辨.儻匪皇慈之洞鑒.詎容小己之保全.茲蓋恭遇皇帝陛下.擴博愛之深仁.推好生之盛德.惟天爲大.徧覆包涵而靡遺.如日之升.遠近幽深而必照.察臣性本于疎直.憐臣夙勵于樸忠.不忍嚴誅.尙存善貸.臣敢不洗心念咎.銘骨知歸.迫暮景之桑榆.若爲報國.視歲寒之松柏.所以事君.

謝提舉太平興國宮表

竊輔郡之符.自貽謗戾.賦真庭之祿.俾逭饑寒.滋佩恩憐.徒深感涕.臣某誠惶誠懼頓首頓首.伏念臣學

知爲已仕切慕君荷聖神識拔于衆人之中遭逢特異躡侍從周旋于六官之長忌嫉已多惟思樸直以盡忠詎敢窺覲而幸進竭因請外復玷承流謂抑強禁暴者刺史之常規若避事懷私者古人之深恥豈慮中傷之銖積遂能搖動于風聞含沙幾類于短狐射市乃遭于強弩誣其怨望固已墜臣于深淵讐以貪汙直欲錮臣于聖世賴至仁之在上知羣下之隱情洞見肺肝保全軀命然臣恐懼閱三時之久驕窮懷十口之憂未容放跡于山林但有投誠于君父函蒙鴻造肆軫餘生靡廩稍于安閒貸馳驅于衰病茲蓋恭遇皇帝陛下曲成萬物懷保小民力辨忠邪益恢張于治具大明黜陟庸不變于士風將轉尺之有施示蓋帷之罔棄察其旣往許以自新臣敢不砥礪素衷激昂晚節無功而祿第爲餬口之羞有命不渝尙切粉身之報

再任興國宮謝表

綏西清學士之班尙叨美職賦南紀祠官之祿益愧罔功祇荷恩憐莫知報塞伏念臣才爲短拙分實驕單圭竇華門竊有棲遲之幸竹筍木屐自嗟嫁送之頻顧榮遇之已多曾生涯之未給一昨坐謾于郡寄繼蒙予食于真遊抱詩禮以傳家詎忘所守課蠶鹽而玩歲僅活其孥逮茲秋滿之初復起年饑之慮飛而控地志宜遂于歸田窮則呼天心但祈于雨粟果勤洪造仍畀素餐茲蓋恭遇皇帝陛下德本好生治先從欲體成周之歸厚草木依仁法炎漢之用寬昆蟲咸憚肆紓臨照施及妄庸臣敢不奮厲忠衷激昂晚節枯魚未朽旣均被于斗升老馬載馳或粗知于道路

三任興國宮謝表

謫材無用。祇退伏于田廬。明命有加。乃荐叨于祠館。荷天從欲。揣分興慚。伏念臣頃以憲恩誤蒙選拔。典領三銓之重。詎罄論思。蕃宣兩郡之繁。遽貽譏議。一去闕廷之下。六驚歲月之遷。戴益曷望于層霄。徒懷眷遇。伏櫪自甘于末路。倍費保全。惟負郭之未充。慨投簪之甚迫。尚懶廩稍獲在安。間得象罔之珠。益知味道。受支離之粟。滋愧匪功。茲蓋恭遇皇帝陛下。仁覆羣生。春熙庶彙。謂臣早更州縣。官脅力之寢愆憐。臣久侍禁嚴。亦姓名之屢記。肆加存拊。俾逭飢寒。臣敢不思報厚恩。誓殫晚節。餘生未泯。儻爲尺蠖之伸。素志僅酬。或致寸莛之効。

江東轉運判官謝表

竊食無功。久尸于宰掾。使私有請。尙畀于使軺。祇屆部封。具宣詔旨。伏念臣零丁墜緒。歷落凡材。一趨君璽之嚴。五閱歲躔之換。爲郎甚寵。乃官謗之自貽。去國稍淹。迄州符之未試。曲荷乾坤之造。再瞻日月之光。南省西樞之聯。曾微報効。中臺右轄之屬。荐至攝承。揣分輸誠。拜恩從欲。策名中祕之府。錫節大江之塙。地接行畿。實總陪都之調度。跡違文陞。重勤睿訓之丁寧。此蓋恭遇皇帝陛下。天覆堯仁。日躋湯聖。衡持內外。初無彼重而此輕。器使賢愚。靡間寸長而尺短。治厲精而匪倦。功復古之是圖。致此妄庸。姑從寄委。臣敢不益堅素守。無負聖知。雖攬轡登車。未究昔人之志。儻給軍轉漕。或殫異日之能。

謝起軍轉官表

羽檄調兵僅供常職綸言錫命乃沐異恩悵懇避之不愈第祇承而爲愧伏念臣猥以頑冥之質誤蒙神聖之知入侍禁塗豈有論思之效出分藩服曾何善最之稱當周王田獵以選師仰漢帝聖書而賜郡元戎十乘奉追召之旣嚴次國二軍觀驅馳而敢後亦妄陳于末議竊自獻于愚忠深懼譴訶詎宜褒陟披肝瀝膽謂有願之必從縮頸汗顏迄無功而受賞此蓋恭遇皇帝陛下激昂士氣砥礪臣工陰闔陽開務作新于庶政乾旋坤闢思底定于萬方致茲增秩之榮靡聞尸官之濫臣敢不欽承訓飭彌謹藩宣躬阡陌勸農桑益布維新之令修車馬備器械庶觀復會之期

謝除待制表

分符出守已叨便近之藩錫命寵行尙綴禁嚴之列懇辭莫遂踴受彌兢伏念臣久以庸愚誤蒙簡拔周遊省戶參據屬者九年密勿從班備銓衡于兩選積有丘山之厚戾了無塵霧之微勞外并名州實踰分願中聯美職滋冒恩榮悅然未定之驚魂甚矣橫流之感涕茲蓋恭遇皇帝陛下仁如天大德與日升器使羣材營蒯盡歸于採掇生成庶彙蟲魚咸遂于飛潛曲示眷私用光臨遣臣跡雖違于丹陛名猶溢于清廂惟近臣獻納之私未殫于補報若刺史中和之布敢負于使令

除龍圖閣學士謝表

買三銓之長久玷近班首六閣之聯遽叨美職恩踰意表愧溢顏間臣某誠惶誠懼頓首頓首竊以入從出藩本侍臣之常禮循名責實斯主上之至權逮夫寵數之驟加必有勞能之可紀仰河圖于東序是惟

冠百世之彌文。通禁橐于西清。必以待一時之舊老。如臣者少而孤陋。晚益顛冥。符節屢頒。久載馳于周道。玦環遞賜。悵幾入于修門。未酬神聖之知。竊有滿盈之懼。茲由常伯自詭。使藩綸命高華。豈謂疏榮之特異。奎躔炳耀。殊非避寵之能安。此蓋恭遇皇帝陛下。湯聖日躋。堯仁天覆。察臣持循法令。粗知課力之方。俾臣宣布詔條。曲示臨民之渥。顧此鶩鳩之質。曷窺龍馬之光。臣敢不祓飭懦衷。答揚隆施。官雖外服。尙司寶禁之儲。名在諸儒。敢忘論思之報。

權吏部侍郎謝表

服勤公掾。濫一官四至之榮。列職禁塗。積十載九遷之幸。拜恩逾厚。揣分奚宜。伏念臣仕本慕君學。知爲已守。高曾之規矩。嗟涉世以自疎。聞師友之淵源。慨決科而已繆。一從縣宰誤玷王官。夤緣寢歷于省臺。出入薦叨于符節。微軀欲奮。幾成控地之鳩。弱羽易摧。屢作退風之鶴。矧憂支離之後。荷生成收召之殊。兩轄重陪。豈有彌綸之効。西垣暫直。曾何潤色之工。方虞未免于譴訶。敢意遽蒙于簡拔。惟茲選部實異他曹。內以檢制于吏軒。外以整齊于士類。當劇煩而罔避。匪庸懦之所堪。此蓋恭遇皇帝陛下。天覆函生。日熙庶政。賢者在位而能者在職。舉無棄于羣材。仕者欲朝而農者欲耕。俾各安于至化。眷茲銓敍之職。責其愚鈍之功。臣敢不三沐自修。百爲盡節。若課吏期于平允。可無衡鑒之功。而從臣許以論思。尙切涓埃之報。

除吏部侍郎謝表

典銓無補每懷代匱之憂拜命有加乃冒爲真之寵伏念臣愚不更事老無取材用意闊疎最出衆人之後秉性樸直但期聖主之知自擢貳于銓衡實坐靡于歲月威靈遠被僅揚使者之旛職業空居猶竊從臣之橐本虞曠戾敢冀恩榮此蓋恭遇皇帝陛下不冒華戎裁成品彙謂上策莫如自治將內外以舉安思衆賢聚于本朝故涓埃之咸取顧嗟庸懦亦在褒陞臣敢不仰體至仁督堅素履惟守資格而師法令罔敢怠遑若殫忠盡而罄論思是爲報塞

郊赦加食邑謝表

禮行郊報初莫預于駿奔恩衍戶租乃重沾于惠術叨榮逾厚揣分知慚伏念臣久去班聯尙尸祠祿材能素諭了無橫草之功齒髮寢彫第有守株之志莫致慶成之善頌遂膺進律之殊褒駢邑既增取禾興愧此蓋恭遇皇帝陛下化參天地道通神明方萬歲以成純躬致嚴禋之祀靡一夫之不被益均臣庶之歡申賁絲綸用彰典禮臣敢不誓圖報稱欽佩眷慈縱觀渭上之朝詎忘異日獨抱周南之病自信餘生

謝進封潁川郡公加食邑實封表

慈皇介壽需及敷天微臣何功例叨進律仰止王言之賁逮躋公社之榮伏念臣材不逮中愚無所用蚤蒙異擢詎忘補報之階自取謗傷尙竊安閒之祿方舜治格無爲之盛乃堯齡臻難老之期千歲有逢萬邦胥慶錫爵遂超于五等疏封且冒于多田茲蓋恭遇皇帝陛下老老以興民君君而賦政盛禮備樂成儀煥于兩宮宥罪薄征懼聲溢于四表慨茲朽質曷副深仁臣敢不誓罄丹誠恩酬洪造老當益壯況懷

伏櫪之心用之則爲益勵守株之志。

謝加食邑實封表

臣某言伏准告命以明堂大禮慶成加臣實邑三百戶食實封一百戶臣已望闕謝恩祇受訖者禮行泰室曾草預于駿奔賞逮羣工乃例霑于惠術人微曷稱恩重莫酬伏念臣久玷從班尚叨祠祿散材無用自甘屏跡于丘園盛典有光豈復相儀于禮樂解澤旣敷于溥率歡聲實徧于邇遐未嘗趨造于朝猶蒙多與之邑茲蓋恭遇皇帝陛下日新聖德天覆萬方弗遺小臣欲賢愚之並施爰有大賚俾動植以知仁臣敢不誓竭疲庸仰思報塞三百戶而無眚足增寒陋之華八千歲以爲春但祝聖神之壽

代賀南郊禮成表

泰壇修報寶歷迎長惠浹百神歡均四海恭惟皇帝陛下仁如天地德類祖宗年穀屢豐馨香薦于至治禮樂大備形聲協于泰和惟茲上帝之博臨式見聖人之能饗合祿允塞益顯從周之文並佑孔嚴光昭復禹之盛臣屬叨假節阻預奉璋聆熙事之備成惟深忭舞布詔書之寬大彌切欽承

代施資政謝靜江府到任表

擢從祠館就領帥符恩許自新顧馳驅之敢後榮踰始望徒跼蹐以靡遑已見吏民具宣詔旨伏念臣性資凡陋術業空疎比叨預于政機迄無裨于國論老將耄及寧逃負乘之譏福過災生積有素餐之戾曲荷乾坤之造尙寬鉄鉞之威竊食投閒慨驚魂之未定銜恩起廢悅神觀以俱還惟茲八桂之封外控百

蠻之壞奉琛面內廟謀方事于綏懷剖竹臨邊閭寄益資于鎮撫豈駁衰鈍可副使令茲蓋恭遇皇帝陛下大度兼容至明洞照任賢而福天下邁成湯選衆之仁進德以尊朝廷迪虞舜知人之哲洪啓同賓之意

代江南提舉范直閣謝到任表

千里造朝方蒙于收召十城命使遽玷于光華已屆部封恭宣詔旨伏念臣起家塞遠涉世迂疎一昨籲跡于書林屢嘗賜對于便坐身逢聖主每懷造膝之忠意忤權臣幾致反唇之罪三祈閒館兩左遐州幸公道之復開獲清光之再覩愚衷自勵雖知僅免于悔尤舊學寢荒豈有發明于議論敢期齒獎曲賜眷憐寵之內閣之名付以外臺之寄人微恩厚感極涕零此蓋伏遇皇帝陛下懋建大中敷求至治乾綱獨運節萬務以鼎新離照無私萃羣材而器使致茲庸瑣亦誤選掄臣敢不深究貨源持平廩政雖激濁揚清之事職所願爲若奉公守正之心義當無替

代劉給事謝復祕閣修撰致仕表

竊食真祠久逼桑榆之暮拜恩內閣遂築田里之歸揣己踰涯荷天從欲伏念臣奮身塞遠賦分奇窮從六藝以決科僅而得仕接諸儒而奏技晚特逢時頃繇憲府之聯獲冒書林之選螭坳載筆嘗預記一王言鳳閣判花復濫司于帝制進膺瑣闈數侍清光乃遽速于顛隕迄自投于閒散鄉閭作佚旣閱十年香

火無功殆逾數任惟是衰殘之質寢登耄耋之期力已弗任無復爲駒之意老將奚遑徒懷化鶴之悲祇有布其腹心庶自乞其骸骨豈期睿眷特貢殊私稍還論述之名俾識退休之寵義兼念舊恩出再生茲蓋恭遇皇帝陛下簪履與慈蓋帷示軫欲曲全于小物肆紓照于容光謂臣麋鹿之姿豈軒裳之是適憐臣犬馬之齒曾鐘漏之幾何許以傳家尙爲報國臣敢不効忠自勗守道弗渝擊壤而歌唐虞預識豐年之瑞閉門而詠周孔益知化日之長

代徐侍郎謝宮祠表

典銓法從久懷竊位之羞賦祿真祠更遼養疴之請恩輝逾厚感涕何言伏念臣性本闊疎才仍淺陋早緣執戟不爲當路之容晚預賜環最取衆人之後使北庭于將變持漢節以僅還擢副民曹顧已亡于善狀易司吏選曾不畏于多言徒知肝膽之欲輸豈謂筋骸之難強衰頽彌甚疚發動者兩三災患相仍意不如者七八雖際飛龍之運自甘退鵠之蹤尙軫皇慈曲從私志旣假珍臺之佚復聯書殿之榮此蓋伏遇皇帝陛下德合無私功存善貸擴大明于日月獲望清光拯微命于風波少安散地示蓋帷之罔棄俾棧豆以知歸臣敢不益佩弦章自親藥石老馬或知于道路固絕望于馳驅犁牛無用于山川第服勤于未耨誓堅晚節靡墜素風

太上皇后賀牋

臣某言伏覩詔書光堯壽聖憲天體道性仁誠德經武緯文紹業興統明謨盛烈太上皇帝聖壽八十皇帝帥羣臣詣德壽宮加上壽聖齊明廣慈備德太上皇后尊號冊寶者聖皇紀壽益上萬年之期神母齊徵方隆四海之養禮行當寧慶及敷天恭惟壽聖齊明廣慈備德太上皇后殿下厚德承乾柔明婉日遇周郊之胥宇輔成再造之功踰漢掖之練衣同膺難老之貺載申顯號允屬昌辰日居月諸共仰西池之宴天明地察更占南極之祥臣濫秩祠官阻趨魏闕觀大父母人倫夙正于乾坤有聖子孫國祚永符于箕翼

皇后賀牋

臣某言伏覩詔書加上太上皇后尊號冊寶者慶集親庭掩漢唐之盛事祥開壽歷紹堯舜之高年喜溢寰區光生典冊恭惟皇后殿下化行恭儉德茂慈仁肅陰教于中閨會朝惟謹奉常珍于西內左右無違穆卜柔神助成縕禮施于孫子嚴青宮而致綠車之遊燕及皇天贊玉卮而集瑤池之上臣猥叨祠秩阻綴廷紳稱萬歲之觴重霄在望仰三朝之會率土馳誠

代湯丞相母夫人賀中宮牋

迎嗣歲之嘉祥母臨萬國正長秋之顯號婦順兩宮喜動宸闈歡均寢宇恭惟皇后殿下體參坤厚德配離明慶久襲于勳闥本塗山之自出譽夙彰于朱邸符媯汭之來嬪果覩樟衣進膺寶冊奉燕祿之文韞

宜百斯男躬寢館之懿箱俟三之日妾叨榮盛際就養私庭王化所基方仰自家而刑國人倫既正敢忘教子以事君

南澗甲乙稿卷九

狀

看詳學事申狀

看詳國史院具到典故。元符二年詔諸路選監司一員提舉學校。仍知通專一管幹卽係自祖宗以來至是方委監司知通提舉管幹學校並未入銜後至崇寧三年蔡京用事欲變天下學校盡爲三舍始置諸路提舉學事官一員以爲監司大觀間修入三省法諸知州通判並稱管幹學事大中大夫以上稱提舉武臣知州不帶及宣和三年徽宗皇帝已詔罷天下三舍止令太學以三舍考選諸路以科舉取士諸路提舉管幹文字並皆罷訖至紹興十三年因權發遣建昌軍李長民以外郡小臣佞悅秦檜謂和議旣成儒風復振欲令知通令佐依舊帶提舉或主管學事結銜以示聖朝偃武修文之意遂復從之紹興十六年諸路提舉學事委轉運司有出身官一員兼領俱無出身卽委從上一員亦不專置提舉學事之官稍如元符舊制而知通令佐入銜猶用蔡京之法殊非徽宗皇帝宣和三年罷之之詔也竊緣州縣興崇學校政事所先守令專管亦爲本職若依元符及宣和故事止令監司一員兼領提舉學事而守令等專一管幹並不入銜始爲至當今來知州縣既有通任武臣去處則一州一縣之事無所不當預者兼元初繫

衡係以管幹爲名亦是措置錢糧修飭學舍振舉法令招集生徒之類卽非干預講說考校之事若令武臣守令依文臣例入銜亦足以責其應辦學校不至闕誤更乞朝廷詳酌施行

看詳都轉運使申狀

檢准國朝會要端拱元年以右諫議大夫樊知古爲河北東西路都轉運使自是遂以爲例應侍從官除轉運皆爲都轉運使有以兩路爲都轉運使者卽樊知古河北東西路諫議大夫集賢院學士李迪龍圖閣待制范雍等爲陝西都轉運使是也累朝除授不一其任侍從官則不問兩路一路並爲都轉運使紹興初向子諲以侍制任兩浙都轉運使趙子淳以雜學士任江西都轉運使係差第三任轉運使資序人諸路轉運使係差第三任提刑資序人諸路轉運副使係差第二任提刑資序人若資序未及卽帶權發遣字或任大卿監有除轉運使別無任侍從官除轉運使者今來若依典故卽合以侍從官任都轉運使施行

論田畝數和買狀

本州先于淳熙五年三月十二日准轉運副使吳修撰牒尙書省劄子戶部申都省批下新知鄂州莫殿撰奏陳乞將經界已定田畝物力等則逐畝均數和買二月二十七日三省同奉聖旨先令吳淵行下兩浙路州軍仰守臣同所屬知縣博詢民情究見利病如今來臣察奏陳經久可行從本司審度條具申尙書省劄付當職當職照對得臨安府富陽縣措置已將第五等物力一十三貫已上均數和買

已得適中并據本司簽廳相度將諸縣五等物力比附富陽縣所行以十分爲則捐出末後一分作下等不敷外其餘九分並行均敷和買牒州從長相度經久可行條具供申州司備錄行下諸縣相度供申去後次第據諸縣申到內義烏縣自經界後從第一等止五十貫物力并金華蘭溪縣各四十貫及永康武義東陽浦江縣各三十貫以上敷納和買至今經久并無詞訴若依富陽縣例敷止一十三貫及轉運衙簽廳議以十分爲率捐出一分不敷餘九分並行均敷竊慮優減上戶卻致歸在下戶事體偏重或生詞訴具狀回申去訖至今年三月十七日以後再准轉運衙牒准行下尙書戶部符據婺州蘭溪縣王宗等四名狀理本縣自四十貫文物力起敷和買豪猾肆姦多立詭名並以四十貫文以下立戶不用科役竊見臨安府富陽錢塘仁和縣嚴州壽昌縣自物力一十貫以上並起和買卽無詭名等弊恭覩淳熙五年莫殿撰申請正令所陳乞送轉運司一就相度供申牒州遵依已降指揮守臣同其餘縣分知縣博詢民情究見利病指定供申又准轉運衙牒准行在尙書戶部符准都省批下權知真州陳通直劄子陳言乞將人戶田產物力各隨畝步數均出和買又都省批下權發遣南康軍吳諒夫劄子奏豪富之家皆爲詭名夾戶規避和買乞以和買如夏稅之法敷于步畝使產多者和買亦多產少者和買亦少等事戶部勘當緣已有前降莫殿撰申請指揮令下轉運使詳本官所陳及已降指揮一就審度經久可行條具保明供申朝廷施行牒州施行具博詢民情究見利病一就從長相度經久可行條具供申等事須至供申

右州司所准前項指揮本州今與州縣官博詢民情講究利病相度莫殿撰陳通直吳知軍申請及蘭溪縣百姓王宗等狀若將物力十貫或十三貫以上並起和買除捐最末一分不敷以防詭戶之弊竊緣和買之法止謂物力富實之家可以科買若併及小戶即是增添夏稅深慮詭戶夾戶之弊未能頓革而貧民下戶先被科擾且以一縣物力論之統計一萬貫上三等五千貫合出和買下四等五千貫不出和買今若都以上三等合出和買之數均之下四等則是上戶反減舊數下戶便添輸納其不可一也若以田產只計頃畝起收物力每畝以若干爲則至若干畝即出和買緣經界起稅各有等則以田畝論之有水田有平田有高田以園地論之有平桑有山桑有陸地有茶地有竹腳有柴樣難以一例便計頃畝均數必欲各等隨則分定則是又行經界情弊愈多爭訴不少未得了絕兼又坊郭營運房廊上亦有物力每至若干卽起和買之數如此均數則戶眼倍增丈尺繁碎縣道戶長催科益難其不可二也且以本州七縣目今所行亦自不同金華、蘭溪則四十貫以上義烏縣則五十貫以上永康、武義、東陽、浦江則三十貫以上始敷和買行之既久並無詞訟止有蘭溪一縣王宗等四人今來投狀尋喚上詰問並契勘得蘭溪縣物力共管物力一百九萬五十四貫其合起和買四十貫以上人戶計五十四萬三千三百貫其不起物力人戶計五十四萬六千七百五十一貫即是上戶少于下戶物力錢三千四百餘貫竊慮日後下戶日增物力不等今議欲以一縣物力算定須上等起和買人戶物力錢與下等不起和買人戶物力錢各要數目中分一般每三年一次比算如遇下戶物力多于上戶一分以上卽別立物力貫數均定和買每

次以十貫上下爲率如蘭溪縣元係四十貫以上卽合減作三十五貫上下起數庶得關防減免之弊不至走失上戶物力常得均平卽難以限定十貫十三貫之比卻致優減上戶均在下戶永遠爲害或見今上戶物力與下戶物力數目適已相等卽合依舊更不更改仍乞朝廷申嚴詭戶之禁立限百日許其首併限滿不首許人陳告以所告田產給之坐以違制之罪其官戶所置田產偶因前後官稱不同亦令改正若蒙詳酌依本州所請則上戶物力不至走失其逐歲和買不過舊數而下戶物力尙有一半惠及小民比之只捐一分大段不同加之詭戶旣嚴必罰無貸自然可以潛消弊倖不必紛紛以從一切論之實爲允當謹具申轉運衙伏乞詳酌備申朝廷施行

措置武臣關陞狀

今月二十三日準尙書省劄子大小使臣關陞從軍理任必以戰功爲別其從軍者必以實歷爲先稍用薦舉以異于戰功之士等事緣有未盡送某限三日措置申尙書省今具措置下項須至申聞者

一在法使臣兩任監當實及六年滿替年三十以上者到部方與關陞親民昨因紹興九年四川宣撫使申請隨軍大小使臣理爲資任自給到吏部理任差帖印續日實及六年許免到部就任關陞親民依舊從軍使喚無朝省付身以二日當一日緣有功人與無功未有旌別欲乞從軍理任後會立軍功轉官實及六年依舊許行關陞外其不會轉官人亦合依無付身例以二日當一日

一從軍使臣若在軍未成關陞考任因離軍任州縣諸司差遣自依外任通理關陞外其偶緣老病不堪

披帶揀汰差充不一務窠闕合行優假欲乞免行關陞止與通理考任依格陞注差遣。

一非從軍在外使臣舊法係合實歷六年乾道七年申請並于歷過考任內須要實歷州縣職事或諸司官屬一任二考方許通理前後任關陞竊慮一能更歷事任欲乞並要實歷州縣職事或諸司官屬兩任四考通理六考方行關陞。

一宗室許歷外任正欲更練職事近來多注嶽廟差遣習爲廢弛緣乾道元年已有復置宗室監當釐務窠闕欲乞亦要實歷州縣職事或諸司官屬一任二考通理四考方行關陞。

一武臣薦舉狀止有陞陟任使一等自來僅當功分自淳熙元年于薦舉武臣陞陟狀內立一兩紙添作舉充親民任使稍爲優異欲乞除從軍入外應武臣六考內並要陞陟舉狀二紙內舉充親民一紙欲使關陞。

一歸正歸朝使臣者不係從軍并釐務差遣既無職掌合與優假依揀汰人例免行關陞止令吏部通理所歷考任依格陞注差遣。

一所有軍班吏職出身及進納人等關陞已有專法指揮者並令依舊右謹具申尙書省伏候指揮。

集議繁冗虛僞弊事狀

具位某等准尙書省劄子備坐監察御史徐詡奏到繁冗虛僞弊事七月二十三日三省同奉聖旨令侍從臺諫兩省官集議申尙書省某等照對本官條具事內有現行條法該載明備者止合有司檢舉申嚴

自不須集議外有條法未盡施行未備事件今集議到下項

一中書天下之本不可不清自諸大郡倅收爲堂闕加以有川廣小郡不在此限之文守倅除授益以不均故有改官後無一日考第而得大郡倅者有作縣以罪罷而得廣中大郡者其間腳色無瑕疵或曾任繁難大縣或諸司列薦人往往或注列郡倅或注諸司幹官開僥倖之門塞公平之路長奔競之風成朋比之私其害莫大于此臣愚以爲職事及監司若大郡守皆須宰執擇才進擬其餘中下州軍及大郡倅宜盡發還吏部士大夫整會官職差遣理雪罪名凡于身計並以通封狀子遣人于都堂投之一切私禮悉令勿講照對舊法吏部知州軍運判員闕甚多士大夫依資格注授其經堂除者號爲擢用而在堂窠闕皆是重地要藩守貳選任不輕士大夫亦以爲榮至紹興初舊法不存止憑省記猶以知州軍二十七闕令吏部注授盡爲堂闕蓋吏部注授則限以資格也堂除則有不問資格者矣然畏指議防繳駁其不問資格者猶不常有自淳熙二年知州軍闕盡歸于堂而吏部更無知州軍一闕以待孤寒資格之人而又又有川廣小郡不在此限之文人人盡可于堂以望州郡使吏部銓法遂爲虛設所謂川廣之郡實亦未嘗分其大小一例與之此公議所以籍籍也至于堂除通判窠闕發下部者僅十六闕爾今來職事官等若從吏部申請悉遵舊制諸在京職事未至監察御史以下履歷尙淺供職未久陳乞外任者不得除監司知州軍差遣特旨除授或資序已及者不論而不用限年除郡之格則知州軍元係吏部窠闕及川廣小郡合還吏部緣其間職事官等補外卻有合陳通判之人難以逐一降指揮令吏部注授通判合以堂

除通判處之則堂除通判不可盡罷乞自三省選定堂除知州軍通判若干員額外餘闕令吏部並依格法注授亦足以息奔競之風矣至于士大夫以通封狀經都堂整會官職差遣理雪罪名凡于身計亦是舊規自合舉行若私第一切不見賓客恐無以審觀人材詢訪外事宜遵守淳熙二年指揮大臣日見賓客有妨治事私第除侍從外其餘呼召取覆等官每日各止許接見一次實爲允當

一修葺城壘調發軍兵修造棟宇皆官吏之職分何有勞効而特轉官資又轉官者或併轉兩官進職者或併進三職尤爲僥倖仕子雖不可裁抑少嚴銓試之法兩歲或三歲一試兼聞近歲至有代名入試者仍須場屋更加嚴密照對修城壁築堤堰營造屋宇已有今年臣僚起請候經三年委實堅固方許推賞正月十九日奉旨令屬曹部置籍訖宜令常切稽考轉官進職有濫賞者御史臺察舉以聞其三年內有損壞者追降所進官職若仕子銓試之法兩歲或三歲一試試期太遠祖宗立法每歲銓試春秋兩次今已併爲一次矣十人取七今已減爲兩人取一矣去歲大吏奏薦文臣二百二十八人武臣乃一千三百九十二人前歲科舉特奏名進士亦三百三十八人則文武仕子自爲不多若更展銓試則正奏名進士第五甲人赴銓試者亦令又展三年是陰殿其一舉矣此不必議也至武臣呈試與銓試同銓試自宰執子弟以降皆不得用恩例幸免呈試并戶部催綱承受榷貨務號簿官隨逐奉使與接送館伴下官屬之類夤緣免試此不可不革也就使不習弓馬亦當試以刑法書算如人吏試補之比其奉使出疆雖曰稍勞而文臣未出官人奉使所辟差者亦不免銓試也乞自今文武一例不許免試武臣累試不中亦依文

臣限年四十許參部授殘零在本等人名次之下乃爲至當其餘代名入試之禁今年二月已降指揮依吏部措置先召保職官二員委保正身不是代名入試日責書鋪識認狀特立賞格重行斷罪不須更用簾試虛文每歲更令有司常切申嚴施行

一方今天下雖並侈靡而輦轂之下爲最甚四方來觀歸而效之惟恐不及宜命多聞有識之士編輯法令而參之以禮凡室廬車服冠婚喪祭燕饗餽遺皆立爲定式自成一編如司馬氏書儀及諭俗書之類頒而行之但先治都城之內風俗既變則四方無不從矣照對淳熙三年十月十六日已降指揮禁約奢侈踰制事件行在專委臨安守臣嚴切禁止斷在必行如有違戾令御史臺覺察彈奏先次將守臣重行責罰其犯人依條斷罪追賞有官人取旨施行外路州軍依此仍委監司覺察按劾多出文榜曉諭緣銷金鋪翠服用僭侈自有禁令其屋宇器皿首飾下至鞍轡繖轎皆有定制非不嚴切然風俗侈靡未能類革竊見前代及本朝皆有誠諭風俗之詔若特降明詔俾四方士大夫之家欽承旨意務遵禮法皆事純儉則閭巷小民久當自化風俗其何患不易哉右謹具申尙書省謹狀

又

准尙書省劄子備坐監察御史齊慶胄奏到繁冗虛僞弊事七月十三日三省同奉聖旨令侍從臺諫兩省官集議申尙書省某等照對本官條具事內有現行條法該載明備者止合有司檢舉申嚴自不須集議外有條法未盡施行未備事件今集議到下項

一塞上書捧香之門嚴吏職門客之格凡曰給使不許其貨賣凡曰異姓必覈其服屬照對上書補官係朝廷一時特恩卽不常有吏職補官自有逐司立究年限條格宰執并兩府使相遇大禮許奏門客係登仕郎不理選限外大禮聖節生辰太上皇后殿奏補使臣各四人皇后殿各二人陳乞回授與本家門客并進奉人逐時特降指揮門客進士補將仕郎主管進奉人卽謂之捧香並係舊法亦無可議之數緣在法諸后妃諸王公主內命婦蔭補親屬如父祖曾仕文資謂朝奉郎以上或身曾得文解免解同而願就文資者聽餘並于班行內安排其門客進士卽非親屬但以進士之名直授文資物議以爲反優于有服親屬若令上件門客如曾得文解者聽乞文資方爲允當其給使補官係宰相執政官反依執政官合得入流減年之人淳熙三年十二月十六日已降指揮並依舊法緣今來所請係謂以賄賂得之者乞令法寺檢坐條法約束如今後有犯務在必行其異姓補官淳熙二年九月二十八日已降指揮臣僚奏薦異姓恩澤並畫出中外所親姓名服圖及升朝二員委保繳連奏狀下部驗實緣內命婦以上奏補異姓旣不召保若令被蔭人供具服圖連家狀繳奏亦爲允當

一重祠祿之命照對陳乞宮觀已有立定條法知縣資序人不許過兩次知州資序年六十以上更許兩次知縣資序以下許陳乞嶽廟一次郡守年七十聽自陳乞宮觀知縣縣令審察不才許授宮觀嶽廟現任通判癃老疾病之人許差宮觀知縣巡尉癃老不職許差嶽廟已有累降指揮自合遵守若通判已下現任癃老疾病不職與差宮觀嶽廟者更令將在任歷過日月通理宮觀嶽廟之任滿罷庶得不至虛費

祠廩少隆于合格宮觀嶽廟之人

一、罷添置之員。有以不釐務通判陳乞改爲釐務者。軍伍之間。既有統制統領。又有將副訓練。而額外準備之名。一切省之。照對不釐務員闕。宗室戚里。自有定制。除歸正歸朝不釐務人。乾道八年指揮許隨人材量試以事委有成效。保明奏舉與改釐務差遣外。欲乞自今宗室戚里等不釐務。不釐務員闕。不得陳乞。改作釐務。其才堪釐務者。自令別行除授釐務。不釐務員闕。所有諸軍正額統制統領訓練將副官以上。有額外准備之名。即不見得。自來係以軍分。如何添置合。與不合。減省。乞從樞密院行下三衙主帥。諸軍都副統制。公共措置。委合如何施行。

一、汰冗冒之兵。州部或以衰殘羸弱之輩。僅充其數。或以逃亡走死之額。權募游手。或一名而兼二名之糧。以便其私。或禁軍而隱于廂軍之額。以避更戍。照對招收不及等仗。冒承逃亡。巧作名色。冗占差出之類。各有條法。約束指揮。並許人告科。以違制之罪。宜令監司帥臣。常切覺察。嚴行科罪。但州郡禁軍。縣寨士軍間有招填未足之數。即合催促招令及額施行。

一、覈補授之詐。進士特奏有就人父祖冒而承之者。仕子補蔭。有妄通譜系。遷移服屬。詭而奏之者。號爲女之夫。實未嘗娶其女。曰異姓之親。實未嘗有姻姪者。照對上件。自有立定條法。召升朝官委保。及州軍等處結罪保明。所保不實者。與犯人同罪。近來朝廷有孫恩懇、姚康朝等冒受行遣。宜令有司取所犯案。連抄節鏤板。行下州軍。常切覺察施行。

一豁虛文之籍。商稅房園錢帛兩水之帳。類非確實之數。又如應在之錢穀。上下舉知其無有而載之。赤歷常占虛數逃亡之苗稅保伍。既不可以備償。而載之版簿。照對諸色帳狀。州委司法轉運司置主管帳司官。而戶部總子在曹。通于金部。會于比部。蓋自國朝三司以來。有此所以勾稽檢轄。不可暫廢。如應在錢物。並是州部經常之數。間有名存而實廢者。緣監司以應在虛數。妄行割刷。指爲贏餘。是致州郡有受弊去處。但令監司不得以應在虛數割刷。此弊自除。逃亡苗稅。亦是州縣常賦之數。其不可去者。恐失元管稅額。以待流移之人復業也。緣州縣不會倚閣。將逃戶稅賦。便攤在其他典買得業人戶下。或勒令催科戶長。乃耆保抱納。是致民戶有受弊去處。但令州縣覈實逃亡稅苗。合行倚閣。則此弊自除矣。

一抑搢紳奔競。照對奔競之風。從古爲患。未仕之覓舉。已仕之干薦。自媒求譽。廉恥道喪。此蓋未易以刑罰禁戢。惟在獎拔恬退之士。有以激勵而消之。昔仁宗皇帝患搢紳奔競。諭近臣曰。括退守道者旌擢。則躁求者自當知恥。是時宰相文彥博、宋庠等舉張環、呂公著等皆被擢用。王旦爲宰相。以張師德文學高第。兩至其門干謁。即不肯遽用爲知制誥。其言曰。以戒貪進激澆薄故也。仰惟聖朝。但得遵用仁祖之訓。而羣臣悉守王旦之言。以裁抑奔競。亦何患有不悛改哉。右謹具申尙書省謹狀。

集議前宰執舉官奏狀

臣等竊惟國朝始制選人改官之法。自大中祥符之年。中外陞朝官每歲皆得舉薦。置籍中書。嘉祐四年。

仁宗皇帝乃召諸路帥守監司各舉所部人材而前兩府臣僚則許通舉內外不問所部也神宗元豐五年遂定會任宰相執政官歲舉改官五人載在令甲至今行之誠以天下之士入仕之初多爲選人改官之後寢致朝列以三歲科舉與夫郊祀奏補之數均之逐歲改官之員不啻裁減其半若不設薦舉則才能無以著見若不限員數則進取無以節抑又慮帥守監司有所知而未盡前宰相執政官者天子嘗與之共天下之政也故委以求天下之才當時詔旨正謂才行之士尚有遺滯而已然前宰相執政雖得不拘內外薦舉而所舉之人又須兼用所部職司一員始得磨勘改秩此祖宗舊章參考互察最爲嚴備以成一代之制也看詳臣僚申請欲令前宰相歲舉一人前執政兩歲薦一人賜以召對卽行改秩而罷其愚謬以議舉者之罰臣等以爲歲貢而有定員所以爲常法而開平進之門也限以舉者五人則足以參考互察矣召對而改秩此人主之異恩也若臣下得以歲舉焉又不限以五人之數則獨薦而改官者將無歲不有其可以爲異恩乎雖曰罷其愚謬竊恐罷者之少未若改者之多也夫以選人改官之微在仕進之階其事爲甚重故引見于廷欲示恩出于上猶進士唱名命官之比而必待人主登之殿陛自擇其才則是屈至尊而下行銓選之事非特舉者之不足信百官有司尙誰信哉至于薦舉之閒干託請求之弊法令具在此諫官御史司公議者所宜察也故臣等以爲姑仍舊法爲便乞聖慈特賜詳酌施行

蔡洗等集議安南國奏狀

臣等具位准尙書省劄子安南國李天祚追贈及其子李龍韜合襲封事五月十四日三省樞密院同奉

聖旨令侍從臺諫兩省官同共議定聞奏者右臣等竊惟國朝故事待蕃夷之禮最爲詳備若高麗嗣子則待其請命然後封以爲高麗國王若占城三佛齊閻婆諸國則待其入貢而遂以爲本國王惟是奉命安南甚有次第其始嗣立則封交趾郡王中間數年以後則封南平王及其身後則追贈南越王自太祖太宗至于累朝必加三命未之或改者蓋以安南本交州內地實吾藩鎮因仍世襲使護安南一道非他外夷自有土地人民不盡臣之比也所以漸次封爵時示恩榮其羈縻制御之道不得不然今來李天祚既薨其子龍韜嗣襲自合遵用祖宗舊章以行封爵恭惟聖慈淵慮乃使臣等定議豈以淳熙元年曾以天祚爲安南國王已有國名疑其禮亦異數故耶臣等聞朝廷昨以安南國王命天祚者初非其國抗章有請特以貢獻馴象方物守藩歲久錫之此名以寵天祚而已安南本都護之稱非可名國而南越之封甚大自漢以來用之則天祚旣沒宜用典故追贈南越王可也其子龍韜雖云嗣襲然未有功勳亦宜只遵典故所加節鉞官稱初封交趾郡王庶爲允當若朝廷謂已曾錫之安南國名不敢虛設則宜去其安南都護稍加以爲知安南國事足矣蓋高麗嗣子每次亦稱權知高麗國事上表此其據也彼或祈乞但令廣西弔祭監司明諭此意候他時職貢不闕續當賜安南國王真命不復更封南平王矣如此則昨所賜安南國名姑以易南平王之號猶須身後始得封爲南越上不失祖宗漸進之意下足以盡羈縻制御之道而于我之事體無所虧損彼之名稱無所鑄改似爲可行不易之論若便欲使其嗣子襲封王位而褒贈天祚別以師傅之官且加美謚則是朝廷自變其禮而不以藩鎮小夷待之驟與外國諸蕃一同不

知既襲王爵數年之後，卻加以是何恩數，其將遂以南越王與之乎？此不可不過爲之慮也。臣等所議如前，惟聖主擇焉。謹錄奏聞。

准三省帖子。今月初一日赴都堂集議。右某等近奏聖旨集議安南國追贈襲封事。已連書具奏緣某等所議，並是考據典故委曲詳備，別無未盡事理。所有國名係已帶知安南國事，卽非遽有奪其王爵欲俟他日職貢不闕，然後加封庶使外夷明知祖宗以來封爵次第，不至別有覬望。所議如前，謹具申三省樞密院伏乞照會謹狀。

辭召赴行在狀

右臣今月十一日准尙書省劄子正月十七日三省同奉聖旨。臣某召赴行在者，臣欽聞嚴命，悚懼無所，伏念臣資性疎直，學識淺陋，荷陛下拔于衆人之中，躡寔從班，曾不能効尺寸之功，圖報聖恩于萬一。昨者出守輔郡，繼移閩嶠，二年之間，罔有善政。惟知奉行法令，未至曠牘而已。然臣齒髮浸衰，心志不逮，比常冒貢危衷，祈就閒散，天聽高遠，尙闕愈音，方欲少俟兩月，再伸誠懇，敢意遽蒙收召，俾覲闕廷，仰惟聖神念舊，未忍棄捐，在于愚分，實深驚愧。伏願皇帝陛下察臣癯瘁，戒在貪榮，憐臣朴忠，非有避事敷求名德之彥，使造內朝，檢會臣前來奏請，畀臣在外宮祠一次，下以全微臣易退之私義，上以副睿主難才之公心。臣則萬幸，臣除已將建寧府事交割以與次官，一面起發前去信衢州以示聽候，指揮外謹錄奏聞。

伏候敕旨。

辭起軍轉官狀

臣伏覩進奏院報聞九月二十八日樞密院奏兩浙、福建、江東路諸州軍起發禁軍士兵赴逐處教閱。守臣以人數多寡參酌推賞數內臣係奉聖旨特轉一官者臣欽奉恩命驚懼無所竊惟國朝軍制之密凡曰禁兵雖募于方州而皆籍于右府故守臣號爲知其軍事而已是州郡之兵實環衛之旅寓糧者也聖神御宇屬意武事近年以來又命選擇日加練閱紀律明備虎符旣下津置起發守臣職也道途無虞部押之官蓋受賞矣聖恩優厚併及臣等顧臣何功之有遽此僥冒况昨降指揮止俟春暖類當發還若二年閒再或戍役則爲守者動有希覬之心臣恐自爾賞過乎與也方陛下綜覈名實大明黜陟之秋如臣守州叨備侍從義當體國內省無庸豈敢虛受兼臣昨因降秩歲月未滿驟有遷轉尤不遑安欲望聖慈留此以勵軍中効命之士推此以待天下立功之人則臣區區愚忠受賜一也所有臣特轉一官恩命乞不施行不勝幸甚干冒宸嚴臣無任瞻天望聖激切屏營之至謹錄奏聞伏候敕旨

辭免奉使回轉官狀

右臣准尙書省劄子以臣奉使回程四月二十三日三省同奉聖旨轉一官者臣仰惟聖神在御務廣至仁聘問之交是爲常禮如臣不肖叨預從班曾何補于事功實坐糜于歲月暫將明命臣之職也初無專對之勞可冒信賞伏望皇帝陛下曲回天造特寢誤恩察臣粗守樸忠憐臣素無矯僞姑以舊典推以官屬臣且仍故秩以効尺寸庶稍安于愚分期不負于聖知所有恩命臣未敢祇受臣無任祈天望聖激

切屏營之至謹錄奏聞伏候敕旨

辭待制與郡狀

臣恭聞恩命。跼蹐靡遑。伏念臣以寒遠之蹤。荷聖神之眷。擢實從班。俯仰再歲。技能短拙。曲賜并容。議論迂疎。每蒙獎與。惟自叨逾過甚。筋力弗任。已具丐閒之章。方欲朝夕上列。敢期天造。尙使治民。碎骨糜軀。未知報塞。惟是西清次對之職。禮秩優厚。守符重寄。懼弗克堪。伏望皇帝陛下。推天地從欲之仁。擴日月必照之施。憐臣粗守樸忠。素無矯僞。收還職名之命。改授一在外宮觀差遣。庶幾愚分稍安。免致清議。臣無任隕越之至。

辭龍圖閣學士狀

右臣准尙書省劄子。八月十二日。三省同奉聖旨。除臣龍圖閣學士與郡者。臣聞命過優。震懼無已。伏念臣猥以凡庸。久玷從列。蒙聖知爲甚異。荷恩渥爲至隆。玩歲曷日。尸位素餐。自知既明。冒昧有請。陛下天地父母之仁。未忍捐棄。倘欲徇其私志。畀以承流宣化之任。在臣愚分。已爲叨逾。惟龍圖祕職。首冠西清。稽之故事。則非賢達而罔居。質之近制。則須功勤而乃授。豈臣猥瑣。所可克承。至于郡寄。臣欲自効。則不敢辭。伏望皇帝陛下。洪覆無私。大明旁燭。收還宸渙。以穆師言。或乞依昨降指揮。檢會臣前來除臣日職。名依舊帶行。庶幾不至過有僥倖。以明聖朝選授之公。以全下臣知止之義。臣無任祈天望聖激切屏營之至。謹錄奏聞。伏候敕旨。

辭除權吏部侍郎奏狀

右臣伏准尚書省劄子二月二十五日三省同奉聖旨韓某可除權吏都侍郎日下供職者臣聞命震驚罔知所措伏念臣稟資愚慙賦分奇窮叨宰掾之華九閱歲踰之換比更憂患尤覺病衰逮茲隸職之期年不勝曠官而惕日方欲自祈于遠外敢期忽被于褒遷揆之私誼則非宜質之公論則未稱況准詮部尤號劇曹倘微通鍊之才曷任甄平之寄伏望皇帝陛下曲垂淵鑒俯亮危誠別求當代之俊髦以副一時之器使籲天之切請命惟期臣無任祈天望聖激切屏營之至謹錄奏聞伏候敕旨

再辭奏狀

右臣准尚書省劄子以臣辭免除權吏部侍郎恩命奉聖旨不允者臣以疎遠迂陋之質家世荷國厚恩今蒙陛下拔擢俾列貳卿在臣么麼可謂榮遇不當固有辭避重念臣才力不能逾人學問無以異衆自還宰士之例復承詢掖之虛狂言屢發而每被矜容孤蹤久滯而尤加軫惻然羣彥方疑于去就而微臣獨冒于遷除雖夙恃于聖知恐難免于衆議況班列之中多有在臣上者遽茲超躐尤不遑安伏望皇帝陛下廓天地之量迴日月之明察臣粗守樸忠憐臣素祈靜退收還成命改畀真材使之宣力于四方尙能仰答于鴻造臣無任祈天望聖激切屏營之至所有恩命未敢祇受謹錄奏聞伏候敕旨

辭免除吏部侍郎狀

右臣准尚書省劄子五月十二日三省同奉聖旨韓某可除吏部侍郎日下供職者有命自天措躬無地

伏念臣賦才甚下。造學不優。一辭州縣之勞。四冒臺省之入。孰云末路。誤簡聖知。敍流品于三銓。粗叨滿歲。暢威靈于萬里。僅止踰時。尺寸靡長。毫分何補。徒懷中憤。之激妄意。事功之期。丹陛獻言。但爲昨日。黃屏受寵。乃不崇朝。雖大君欲礪于庶工。然微臣敢尸于異數。伏望皇帝陛下。推此施以待天下豪傑之士。擴此意以收海內智謀之臣。將力置于中興。宜坐屈于羣策。若愚慮獲伸于一得。則榮名何在于九遷。曲軫危衷。姑仍舊列。惟有忱辭之自竭。尙祈淵聽之可回。庶俾厚恩。不爲虛受。臣無任祈天望聖。澈切屏營。之至。謹錄奏聞。伏候敕旨。

辭除權吏部尙書狀

右臣准尙書省劄子。五月二十二日。三省同奉聖旨。除臣權吏部尙書。日下供職者。臣聞命自天。措躬無所。伏念臣去國雖更于再歲。承流尙玷于兩州。課其治狀。則無以逾人。省其廉隅。則第知守己。夙被聖神之眷。躡躋侍從之聯。豈其記憐于九重之中。遂蒙收召于千里之外。內朝賜覲。粗陳狂瞽之言。天聽不違。曲賜褒嘉之訓。竊懷尺寸區區獻忠之意。敢有絲毫汲汲幸進之心。乃奉殊恩。寵班常伯。矧是三銓之長。實司羣吏之成。雖往歲暫冒于攝承。而一旦遽膺于遷陟。顧賢能之在列。且雋傑之尙多。揣其分義。則非宜。稽之公議。爲可畏。伏望皇帝陛下。俯全舊物。特輸鴻慈。還渥渙于誤頒。東真才而擢任。有如愚陋。俾以退閒。庶幾微臣志盡自知之明。仰副官朝官無虛受之義。臣不勝願幸。所有恩命。臣未敢祇受。謹錄奏聞。伏候勅旨。

辭吏部尙書狀

右某准尙書省劄子十一月二日三省同奉聖旨韓某可除吏部尙書日下供職者臣聞命震驚罔知攸措伏念臣稟資鴻下賦性拙疎技能不異于衆人問學無聞于當世自篤周行之列親逢上主之興攝詞命于西垣薦承睿獎濫銓衡于文部益荷聖知承流兩郡而初無撫字之功錫命九關而復被招徠之寵逮膺常伯曾未踰年徒以世受國恩幼循家訓服其職業之間者罔敢避怨獻于聰明之下者每務盡忠雖乾坤之大無所不容然螻蟻之微退輒自懼豈期冀幸乃冒爲真惟念臣早歲驅馳固有功名之願中年遭遇實無爵祿之懷儻臣言得用于明時則臣志已據于平日至于假臣之過分適以重臣之不安伏望皇帝陛下曲轉至仁特收成渙俾臣姑仍舊職亦足副于使令容臣少效微勞庶以逃于謗戾所有恩命臣不敢祇受臣無任祈天望聖激切屏營之至謹錄奏聞伏候敕旨

薦張竑周壩狀

具位准吏部牒節文四月三日同奉聖旨令侍從臺諫兩省官參照資序差格不以內外雜舉監司郡守歲各五人保舉官及五員以上列銜共奏明言所舉人有何政績才術八月七日三省同奉聖旨保舉官限五員以上列銜共奏竊恐各有所知難以同共論薦可依元議亦聽獨銜歲舉監司若郡守共貳人者

右臣伏覩朝奉郎大理正張竑疏通明敏才術有餘昨任義烏知縣卽有能聲本路監司薦聞審察除監

登聞檢院改差通判信州。權南康軍備著政績。又爲諸司列薦。特轉一官。且被召命。蒙恩授以司農寺丞。繼遷今任。雖理財治獄。悉有可觀。殊未究其所長。又伏覩奉議郎主管台州崇道觀周垌性資介直。臨事嚴明。昨知弋陽縣。本縣寄居豪強。例不肯輸折帛錢。脅持官吏只納本色。一切摧抑不避。衆怨舊弊悉除。繼移祁門、休寧兩縣。催科有法。辦集先期所斷獄訟。人服其平。並無翻訴。臣時爲轉運判官。親見其事。曾任隨州通判。經理邊郡。深究利病。特以流寓家貧入就祠祿。貳人者皆可任監司。或繁劇郡守。如蒙朝廷擢用後。不如所舉。臣甘被欺罔之罪。謹錄奏聞。伏候敕旨。

薦崇安建陽兩知縣狀

具位。檢准淳熙元年八月二十三日勅臣僚上言。命監司郡守精察所部縣令。留意民政。有實迹。公共論薦。三省同奉聖旨。依奏者。

右臣等照對本府諸縣內崇安、建陽最爲衝要。民頑吏猾。前後知縣持身不謹。馭下無術。少有終任。不致訴訟。其間留意民政。有實迹。應得前項指揮者。臣等不敢隱默。臣伏見承事郎知崇安縣事王齊輿。遇事敏明。律己廉恪。斷決訟牒無不中理。本路州縣皆重鹽綱。以爲歲計。齊輿自到任。搬運鹽綱措置出賣。深村窮鄉皆賣官鹽。而勸諭有方略。無科擾。發納本府窠名及諸司錢物。悉皆了辦。募到上戶興修水利。開成星王陂堰。灌溉民田四千餘畝。皆是衆戶樂然雇夫。不曾費用分文官錢。及強有敷斂。又伏見奉議郎知建陽事黃中立。臨政寬和。而事皆無闕。禁制盜賊。摧抑健訟。了納前官欠負。播辦逐歲支費。計置錢

本搬連鹽綱小大並舉本路諸州軍今年起發繁軍士兵無不經由本縣中立去替有日而能預備錢糧批請券食日有支費百色應辦悉無科擾其王齊輿黃中立二人委有上件政績在任滿替並無綰繫不了事件臣某謬叨郡寄稽考並皆詣實臣自得係前知建寧府事今來復領漕計臣儔係在本府置司公共審究備見不誣敢具奏聞伏望聖慈特賜旌擢以爲能吏之勸如逐人後犯入己職臣等並甘同罪謹錄奏聞伏候敕旨

舉蘇嶠自代狀

具位某准令諸侍從授訖三日內舉官一員充自代者右臣伏覩右朝奉郎尙書吏部員外郎蘇嶠議論堅明操履純正名臣之裔綽有典刑臣實不如舉以自代謹錄奏聞伏候敕旨

應詔舉所知狀

具位某准尙書省劄子節文詔臺諫侍從各舉所知一二疏其事實可以充是何職任八月二十三日三省同奉聖旨依奏者今具如後一左奉議郎前權發遣信州軍州事王師愈曾任潭州長沙知縣委有政績諸司列薦繼爲嚴信兩郡戢吏愛民不擾而辦治持論疏通恥爲無用之學堪充郎官以上職任一右宣教郎新差通判隨州軍州事周炯曾任信州弋陽知縣擢抑豪強不避怨謗繼移祁門休寧兩縣持身廉介遇事嚴明吏畏而民愛催科並依省限先足堪充郡守監司職任一左文林郎兩浙路轉運司幹辦公事崔敦詩服勤州縣不廢古文所撰國朝饒歌鼓吹曲筆力雄健有唐柳宗元風又嘗爲資治通鑑